

## Sisa - Awa

### Máhka

**Ebeq sáhnsahwe ahtebé ehwehne.** Máhkawe Sarúsarama suwahpeqte áninéna téhtaré áwíq kéhre. We mó awíqmé Sóni Máhkae. Sísaga marakóipeq ména síwáhnorútaq Máhkawe peh mahbi míowe. We Páhnábása awahrah aní ména Píta séhréh atena anehe Páhnábásareq Porareq séhréh aritowe. Aroma kegá págege sansánsábé suwahbó púana Sísaga págegeue miráú arámpéhríyábé Máhkaga sehiranúwe. Aroma kegá mah pukú sáhnsahwe Sísane ehweh kawerue siahtebéra Sísansabé aiq pútare atageheéna Máhkaga sehiranúwe. Máhkaga mah kawéq éhwéh sehiranúwe.

1

Sóni wání meri merini anínká irarú ehwehne.  
(Mátíyu 3.1-12, Áruká 3.1-9,15-17, Sóni 1.19-28)

1 Sísá Karáhéwé Manikáne ahninkáwá wíre. Kaweq éhwéh áwahewé  
2 Manikáne ehweh irarú ani wenáwíq Ásíaága púkuipéq sehiranue mahraréna,  
Írátíáhro. Néne ehweh korerie anímé ah kawerinkeheéna ebeq eqmaróge.  
3 We abatapi ména sawai sawaiéna mahraréna, Itene Wahnah sína ahmé aborisahro.  
Wene ah kaweraráhro inkehe úwe.  
(Aisaia 40.3)

4 Mah sehiránká irarinserah wání meri merini aní wenáwíq Sóni uworapeq ména ehweh teri terinéna, Manikánka itene ahabábáqsabe kaweraitankéhboq ahabábáq sansa sueq kaweqtaq míáhro. Itene ahabábáq sansa sueq kaweqtaq míéhraqmé wání meiníe úwe.

5 Súría marákórápéqté kéreq Sarúsarama suwahpeqte kéreqka ómiga weba suwe. Su kegá sene ahabábáqsabe Maniká teawúwana Sóniga Sorana aroipéq wání meriúwe.  
6 Sóniga kéhmane áyórate kogahnia aneraneratiowe. Áú aretí wene ayahbataq konahniatowe. Tábahnkákákq sehnáhrabahnkákákq nówe.  
7 Sóniga mahraréna, Inehe si anímé anotah aní ména íné kiotaigme aní míre. We anotah aní púana ínéga nirehunseraráq ména wene súu nahníáq pugereyabe íre awehrari aní múge.<sup>1</sup>  
8 Ínéga peh wání mei meinonana wega Manikáne Awa náinkéhe úwe.

Sóniga Sísá wání meawu ehwehne.  
(Mátíyu 3.13-17, Áruká 3.21-22)

9 Mitaqkake Sísaga Néhsara suwahpeq Kehrari marakórápéqté súwana Sóniga Sorana aroipéq Sísá wání meawuwe.  
10 Meawuwana Sísaga wánípipeqté kiutaq tagówana sabonah sawekúwana Manikáne Awanka tunse kiboki tahnsanéna Sísaba márunsurahúwe.  
11 Márunsurahúwana íópeqté éhwéhnká mahraréna,  
Are niruní nénáhní móne. Arensabé nirutaboiruge úwe.

Owainawanka Sísá áhwárawe tagó ehwehne.  
(Mátíyu 4.1-11, Áruká 4.1-13)

12 Manikáne Awanka Sísá meqmema abatapi móatowe.  
13 Áhnte wehekáh 40 wehekáh Sísá mitaq míowana owainawanka weba séna Sísaga ahabárinkeheéna áhwárawe tagéna áwíoqnówe. Sísá ménkámehnká míórabeq míowara íópeqté kéga weba séra séhréh atówe.

Sísaga Kehrari marákórápéq wene arambehri áhwáró ehwehne.  
(Mátíyu 4.12-17, Áruká 4.14-15)

14 Mó kegá Sóni karábúsiipéq átówana Sísaga Kehrari marákórápéq pokéna Manikáne

<sup>1</sup> (1.7) Naho púkúwé *Manikáne O Ehwehne* ue púkuipéq mahraue karaire. Sóniga mahraréna, Inehe si anímé anotah aní ména íné kiotaigme aní púana wega ehweh irarínaraq íné ehiya míanie úwe.

kaweq ehwéh teri terinúwe.

15 Teriena, Ibora awehraq tanáhráq míre. Manikánka wahnah wahnahnime aiq wahtoni puaq itene ahbabáq sueq kaweqtaq méq mah kawéq éhwéhnsábé aiq pútare aintáhro úwe.

Sísaga itaréitaré wéhyábé, Íné séniráhro ú ehwehne.  
(Mátíyu 4.18-22, Árúka 5.1-11)

16 Sísaga Kehrari kawéhu ayehrápéq noguwara se ábáhré Ehntarureq Sáimónireq tagówe. Sáimóniwe mó awíq Pítáe. Se pah meyóya anité míoyansabé kahweraté wánípipeq uwe taga tagauyana tagówe.

17 Tagéna sensabé, Íné séniráhtao. Amahnága itega kahweraté uwe taga tagaéta pah meyehye. Mina óyanserah wehuke ínéba meriqmeta sighe. Minayabe íwáhnoriniboq séniráhtao úwe.

18 Séniráhtao úwara sene kahwe apubúue mitaq marera Sísá kéroye.

19 Kéroýana Sísaga kure mó abáhré Sébérine ahninkáwáraré síwíqmé Sémísireq Sónireq sene sípiipéq méra kahwewarí kaweq kaweruyana tagówe.

20 Tagéna Sísaga máhotao úwara mi abáhrégá sibowáreq wereq arambehriu kereq sípiipéq suera Sísá kéroye.

Sísaga owainawa kaqauwo ehwéhne.  
(Árúka 4.31-37)

21 Sega Kápénéáma suwahpeq tunse ahrena ahrena wehekáh Sísaga momiwí nahtápéq kibekéna síwáhnorúwe.

22 Síwáhnoréna Mósísiga sehgióro ú ehweh síwáhnoro kegá síwáhnorunserah Sísaga íre miraúwe. Ahqáho. Wega págegeue síwáhnorú púara wene ehweh író kega áhtenuwe.

23 Áhtenuwana owainawanka subiqmaq subiqmarú aní momiwí nahtápéq míowana owainawanka iwíáh atowana anotahtaq mahraréna

24 Sísao, are Néhsara suwahpeqte aní móne. Arega itewe aneraitaníbo? Iubiq iuanie seno? Are Maniká míéhrabeq kaweqtaq mía míaóna aní móne. Arewe aiq tagaríoge úwe.

25 Úwana Sísaga owainawansabé awehgu atena wensabé, Ehiya mé we auwe pokúno atowe.

26 Auwe pokúno atowana owainawanka mi aní kúrugúru atena kareéna we auwena pokúwe.

27 Pokúwara ómi míó kega anotah ahténéra ehmuníq éhmúniréra, Aneqpomo? O ehweh míre. Anotah wahnáh áninká síwáhnori serahnéna Sísaga págege ehwéhnuwe owainawankákáqsábé, Miraoro i puara sega wene ehweh apubúue íráhwe uwe.

28 Moke Kehrari marákórápéq Sísá éhweh apubúue mitaq teri mahtaq terinuwara írówe.

Sísaga Pítane ahrahnawa kawerato ehwéhne.  
(Mátíyu 8.14-15, Árúka 4.38-39)

29 Sísareh Sémísireh Sónirehga Asiu kené momiwí nahtápéq suera kure Sáimónireq Ehntarureqne nahupeq kibekuwe.

30 Sáimónine ahrahnawa osoro awahréna máhriqtaq míowara míó kega Sísá apubúue teawúwe.

31 Teawúwana Sísaga weba séna ayahnkara táhtoqme iriatowana kaweragúwana táhutahuq tíwe náriuwe.

Sísaga áhnte awáhré ké kawerarito ehwéhne.  
(Mátíyu 8.16-17, Árúka 4.40-41)

32 Mi wehekáh íó tupekútaq wehekeqká ómi awahre kereq owainawanka subiqmaq subiqmarú kereq meriqmera Sísaba mórítówe.

33 Mi kehiná suwahpeqte kegá ómi méhpeh sahuríowe.

34 Sísaga áhnte awahreu ke kaweraritena áhnte owáináwámári kaqsuowe. Owainawamarínká Sísá tagaríó púana wega se ehiyansá aritowe.

Sísaga Kehrari marákórápéq kure kaweq ehwéh teriu ehwehne.  
(Árúka 4.42-44)

35 Ahyahbinkerotaq Sísaga iriwe ména mitaq suena abatapi kowéna Manikánsabe púrerúwe.  
 36 Sáimónireq wene iyahnaboreqka koanebahréra 37Sísaga tagéra wensabé, Ómi kegá arensabé anebahrowe teawúwe.  
 38 Teawúwana Sísaga sensabé, Mó ke suwahpeqkakák ehweh teriníboq pokonehe. Terinieéna tumióge úwe.  
 39 Sísaga moke Kehrari marákórápéq noginieéna pokéna Asiu kené momiwí nahmáritápéq ehweh teriena owainawamarí kaqsuowe.

Sísaga anotah naonkákák ání kawerato ehwehne.  
 (Mátíyu 8.1-4, Árúka 5.12-16)

40 Anotah naonkákák ánínká Sísaba séna áhtenú púana arehunseraráq ména Sísansabé pagu pagunéna, Are awahbáhnaraqmé kaweraintahráhone úwe.  
 41 Úwana Sísaga wensabé arutaboiratena ayahnkahkahrue wenaneq táhtorena wensabé, Aiq mirainauge. Are awaho ani míahno atowana  
 42 mina irarútaq wene náonaba apubúue wagúwana kaweragúwana  
 43 Sísaga eqmaranaútaq wensabé, Írátíahno.  
 44 Mó ke teríneho. Írakaumo. Manikáne ehweh mibeq mahbeq aitéh ánípá pokue arene anonka móreawo. Are awaho ani úkire igehboq Mósísiga irarúnserahnue Manikánsabe titirúno éna apubúue eqmaq auwowe.  
 45 Eqmaq auwowana kaweragú anínká pokéna kawerato ehweh mitaq teri mahtaq terinúwara áhnte kegá írówe. Áhnte kegá író púana Sísaga mó ke suwahpeq íre korahúwe. Írakaumo. Peh abatapi kowíowara mó marákórápéqté kéreq mó marákórápéqté kéreq áhnte kegá mitaq weba suwe.

2

Sísaga aiayah pukia ání kawerato ehwehne.  
 (Mátíyu 9.1-8, Árúka 5.17-26)

1 Sísaga táhmaro wehekáh ména mitaq suena Kápénéáma suwahpeq kouwekúwara wene nahtapeq míéhre mitaq teri mahtaq terinuwara írówe.  
 2 Irera áhnte kegá weba sáhatíowara kígíúnsabe mó kegá méhpeh íre míahrahuwana Sísaga kaweq ehweh teriuwe.  
 3 Itaréitaré ánitógá aiayah pukia ání sehgiwera weba suwe.  
 4 Séra ahtapeq kutaq áhnte wehekéqká nahupeq kígíúnsabe sega Sísaba íre kioráhéra nahnsorapéq kire Sísane ayahqnonsoraq abogéh piruqmarera abahrabahrútaq aiayah pukia ání wene máhriqkakák sehitaqmaqme meqmera Sísaga míorabeq márúnátówe.  
 5 Segá iwíáhéra, Sísaga kaweratanawire iwíáhuwana wega sene iwíáh tagéna aiayah pukia ánínsábé, Nánibáq móne. Arene ahabábq aiq kaweratóge úwe.

6 Úwara Mósísiga sehgióro ú ehweh síwáhnoro kegá tútuue méra sirupipeq iwíáhéra,  
 7 Mi ehwehmé aneqsabé irariro? Manikánsabe íre kaweq ehweh atéhre. Ahabábqsabe insega kaweraritahráhiro? Manikánka webataq wehukene ahabábqsabe kaweraritahráhire iwíáhuwe.  
 8 Sísaga sene sirupipeqté iwíáh wene arupipeq tagéna sensabé, Itewe aneqsabé mira iwíáho?  
 9 Aiayah pukia ánínsábé aneq ehweh teawinínkono? Arene ahabábqsabe kaweratóge teawinínkono? Are irigue arene máhriq mewe ah nogo teawinínkono? Íre págege ehwehmé ahnabo?  
 10 Íné wehukení úku anínká mah marákó marákó wehukene ahabábq kaweraritahráhuwe. Sokigi ainíboq tagaríahro éna aiayah pukia ánínsábé,  
 11 Teawiníboq iro. Irigue arene máhriq mewe arene nahtapeq pokúno úwe.  
 12 Pokúno úwana irigue wene máhriq apubúue mewena pokúwara ómi mío kega tagéra áhtenue Manikánsabe iwíáh iwíáh atera, Mahna tahnsa morá ibora tagóne uwe.

Sísaga Áríwáinsabé, Íné séniro ú ehwehne.  
 (Mátíyu 9.9-13, Árúka 5.27-32)

13 Sísaga Kehrari kawéhu ayehráq mó kúwara ómi mío kega weba sáhatíowana Manikáne

ehweh síwáhnorúwe.

14 Sísaga mitaq suena ahtapeq nogutaq táhkísi moné meyo aní wenáwíq Áríwái tagówe.<sup>2</sup> Áríwáiwe Ápíásane ahninkáwá táhkísi moné meyo nahtápéq tútuue míowana Sísaga wensabé, Íné séniro úwana Áríwáiga irigue kérowe.

15 Áhnnte táhkísi moné meyo kereq mó ahabábq kereqka Sísaga kérońsabe Sísaga Áríwáine nahtapeq táhutahuruńtaq mi kegá Sísareq we kéro kereq táhutahuruwe.

16 Táhutahuruwara Mósísine ehweh síwáhnoru Péhrasi kegá minayabe tagéra Sísaga kéro keyabé kasenára, Sísawe aneqsabé táhkísi moné meyáh kéreq ahabábq kereq moráraq táhutahuriro uwe.

17 Uwana Sísaga mi ehwéh irena sensabé, Sóteha awaho wehuké máráhsini íre náriasa peh morá awahre ke náíre. Mina inserah ínéwé kaweqtaq míáh ké séhréh aritanieéna íre suge. Peh ahabábq ke kaweraritanieéna suge úwe.

Sísaga táhutahuq awehrio sansánsabé síwáhnorú ehwehne.  
(Mátíyu 9.14-17, Áruká 5.33-39)

18 Sóni kéro kereq Péhrasi kereqka táhutahuq awehriutaq wehukega Sísaba séra kasenára, Sóni kéréh kéreq Péhrasi kérérah kéreqka táhutahuq awehriowara aneqsabé are kéréh kéga íre awehrioo uwe.

19 Uwana Sísaga sensabé pabeqme ehwéh teriena, Pahuwirotaqmé o menáhwé wene iyahnabo ba míéhtáqmé táhutahuq awehrioo? Írakaumo.

20 Mókake o menáhwé seba íre míahnaraqmé mi tanáhráq wene iyahnaboga sirutaboirára táhutahuq awehrigehe úwe.<sup>3</sup>

21 Sísaga mó pabeqme ehwéh mahraréna, Wehukenínká nahonáh sáhkétí kawerinieéna o ambántáraté íre páruwe kawerire. Miraitaq tahirímé nahonáh sáhkétí subanki irino.

22 Wehukenínká o nahniáq sera ano naho naho méméné áuyahwa antehyápépéq íre ahkíre. Miraitaq tahirímé sera anonka muinaraq nahonáh antéhyá tapoagirana sera ano marakóraq antigi irino. Wehukenínká o será ano o antéhyápépéq ahkíre. Wehukega ahkírataq mi tehtáre náneqme kawerue kanae. O será anome kawerue kanae. Antehyamé moq kawerue kanae úwe.<sup>4</sup>

Sísaga ahrena ahrena wehekáhsabé arambehriéyabe irarú ehwehne.  
(Mátíyu 12.1-8, Áruká 6.1-5)

23 Ahrena ahrena wehekáh Sísareq we kéro kereqka páréti mirao naneq será sotápéq kótaikutaq we kéro kega mi será késabariqme késabariqmeue kuwe.

24 Kuwara Péhrasi kegá Sísansabé, Are kéréh ké tagáhno. Ahrena ahrena wehekáh íre mirao sansámé sewe aneqsabé miraoo uwe.

25 Uwana Sísaga sensabé, Itewe Manikáne púkuipéqté séhíramé Tébitireq we kéro kereqka tabonahéra sirupibiútaq mirau sansámé íre sáhsahwe ahtebaho?

26 Wehukeni wenáwíq Ábíátawe Manikáne ehweh mibeq mahbeq arito aní míotaq Tébitiga Manikánsabe iwíáh iwíáh atáh náhúpéq kibekéna Manikánka tagankeheéra máró paréti mewe néna we kéro ke náriuwara sega moq nowe. Mósísine ehweh irarunka mi parétiwé pehipéqté kéga íre nah nanere. Peh morá Manikáne ehweh mibeq mahbeq aritáh kéga nahrahowe ire. (1 Samuel 21.1-6)

tega mi sehirá íre sáhsahwe ahtebaho úwe.

27 Sísaga Péhrasi keyabé mó mahraréna, Ahrena ahrena wehekáh ko púana Manikánka wehuke miraroo? Írakaumo. Wehuke míó púana ahrena ahrena wehekáh mirarowe.

28 Íné wehukeni úku anínká ahrena ahrena wehekáhnkákáq wahnah wahnahnuge úwe.

3

Sísaga ahrena ahrena wehekáh sawenkahnia áyáhnkákáq aní kawerato ehwehne.  
(Mátíyu 12.9-14, Áruká 6.6-11)

<sup>2</sup> (2.14) Mátíyuwe mó awíq Áríwáie. Mátíyu 9.9 tagáhno.

<sup>3</sup> (2.20) Mi ehwéh áwahewé aigarápéqté éhwéh Mátíyu 9.15 tagáhno.

<sup>4</sup> (2.22) Mi ehwéh áwahewé aigarápéqté éhwéh Mátíyu 9.17 tagáhno.

- 1 Sísaga Asiu kené momiwí nahtápéq mó kibekúwana sawenkahnia áyáhnkákáq ání míowe.
- 2 Míowara Péhrasi kegá Sísaga ehweh ataneheéra ahrena ahrena wehekáh Sísaga mi aní kaweratanabiramo éra ebitíowe.
- 3 Ebitíowana Sísaga sawenkahnia áyáhnkákáq ánínsábé, Ínéba sewíahno éna ebitíó keyabé,
- 4 Mósísiga sehgióro ú ehwehnikáwé ahrena ahrena wehekáhnsábé anere teiro? Wehuke kaweritanéhnkono? Íre kaweritanéhnkono? Wehuke séhréh aritanéhnkono? Subiq suanéhnkono úwara se ehiya míowe.
- 5 Se sawenkahnia áyáhnkákáq ánínsábé íre sirutaboiria sirupipeq págegeunsabe Sísane arupipeq umeh agúwe. Umeh agúwana wega se ebitáwéna abiahnsa aritena sawenkahnia áyáhnkákáq ánínsábé, Arene ayahnkara obariro úwana wene ayah obarirowana kaweragúwe.
- 6 Kaweragúwara Péhrasi kegá tueague Érótime iyahnaboreqka momiwíue sío síoéra, Sísawe árahue subiq suanéhnkono uwe.

Káwehu ayehráq áhnte kegá momiwíu ehwéhne.  
(Árúka 6.17-19)

- 7 Sísareq we kéro kereqka mitaq suera káwehu ayehráq pokuwara áhnte Kehrari marákórápéqté kégá we kérowe.
- 8 Kehrari marákórápéqté kéreq Súría marákórápéqté kéreq Sarúsarama suwahpeqte kéreq Írúméa marákórápéqté kéreq Táíya suwahpeqte kéreq Sáíróna suwahpeqte kéreq Sorana aroipéq seberaebéqté kereqka áhnte kehinánká Sísaga miraúnsabe irera weba suwe.
- 9 Áhnte kegá sunsabe Sísaga we kéro keyabé, Áhnte kegá pagunúéhboq sípi wahtotaq mewe sero úwe.
- 10 Áhnte awahre ke kaweraritionsabe moke mó awáhré kégá Sísaga táhtoraneheéra pehentáwe sunsabe Sísaga we kéro keyabé mi ehwéh teriuwe.
- 11 Owainawamarínká Sísaga tagéra wensabé áhreu puara arehunseraráq méra anotahtaq mahraréra, Are Manikáne ahnikáwá wóne uwana
- 12 Sísaga sensabé abiah matawéna, Íné éhweh irariyehboq ehiya míáhro úwe.

Sísaga we kéro ke omaq sito ehwehne.  
(Mátíyu 10.1-4, Árúka 6.12-16)

- 13 Sísaga sáwéhrapeq pokéna wega omaq siteyabe awahbó ke síáhrabúwara weba kíúwe.
- 14 Kíúwana airápéte téhraníte weba míageheéna omaq sitowe. Sensabé eqmaro kee síwíraritena mi kegá ehweh koreri terinigeheéna omaq sitowe.
- 15 Sega owainawamarí kaqsuageheéna págege atena omaq sitowe.
- 16 Wega omaq sito kewe Sáimóniwe mó awíq Pítáe ue áwíratena
- 17 se ábárahre Sébérine ahnikáwáraré Sémísireq Sónireqsabé Póánégie ue síwíraritowe. Mi awíq áwahewé puruburu aníte tahnsane ue síwíraritowe.
- 18 Ehntaru, Pírípi, Pátórómíyu, Mátíyu, Tó máhsi omaq sitena Sémísi Ápiásane ahnikáwá omaq atowe. Sáimóniwe we Kénáni marákórápéqté ánínseq Táriásareq omaq sitowe.
- 19 Súrása we mó awíq Ísikárióti Sísane naruo koweriranaú ánínseq omaq sitowe.

Owainawanka Sísaga séhréh atéhre éra péhe éhwéh iraru ehwéhne.  
(Mátíyu 12.24-32, Árúka 11.14-23, 12.10)

- 20 Sísaga nahupeq kibekúwara áhnte wehekéqká weba mó kiranéhnatíowe. Mitaq kígiúnsabe Sísareq we kéro kereqka íre táhutahurorahuwe.
- 21 Sísaga awahrahga minayabe írótaq, We uwoyansa aní úkire éra we koweraneheéra suwe.

- 22 Sarúsarama suwahpeqte Mósísine ehweh síwáhnoro kegá seye náhenéra, Pésébúri, owainawane wahnahnka Sísaga págege atena séhréh atéh púana Sísaga owainawa kaqsuahráhire éra ehmuníq éhmúníruwe.
- 23 Ehmuniq éhmúníruwana Sísaga sensabé, Ínéba sewíáhro éna pabeqme ehwéh mahraréna, Owainawanka wewe árahue kaqsuankéhbo?
- 24 Wahba marákórápéqté kégá seye ebehirataq sainkoneherawoe. Minayabe se págegeue morá ké íre míahrahowe.
- 25 Sensuwahrahreq seye ebehirataq sainkoneherawoe. Minayabe se págegeue morá ké íre míahrahowe.

26 Owainawanseq wenawahraheq ebehotaq tahirímé se sainkéra págegeue morá ké íre miahraho irino.

27 Wehukénká ayahnsa kira wéhné ménsámehnsá meyanieéna wene nahupeq pehipi íre kibekorahire. Írakaumo. Ebeqme wega ayahnsa kira wéh táhtoqme táhru táhruarena anehe wene nahtapeqté ménsáméhnsá pehipi meyahrahire úwe.

28 Sísaga mó mahraréna, Teiníboq írátíáhro. Ahbabárára Manikánsabe abehq éhwéh atáh kéwé Manikánka mi ke kaweraritahráhéna mi ahabábáq íre ahraq matiankehe.

29 Peh morá Manikáne Awansabe abehq éhwéh atéh ánimé Manikánka mi aní íre insahwé atankéhe. Mi ahabábáq peh ahraq matiankehe úwe.

30 Segá, Owainawanka Sísá séhréh atéhre unsabe Sísaga mi ehwéh irarúwe.

Sísane anowaréh ábákawaréhwe inseréhbo i ehwéhne.

(Mátíyu 12.46-50, Árúka 8.19-21)

31 Sísane anowareq ábákawaréhreqka séra máhpeq iriwe méra mó keyábé, Sísansabé, Mahbeq tuo teawéro uwe.

32 Uwara áhnte wehekéq weba sáhatawéra wensabé, Arenanoreq arenábáqmarinseq máhpeq méra arensabé áhrabowe uwe.

33 Uwana Sísaga sensabé, Náinoreq náníbáqmarinseq inseréhbo éna

34 weba sáhátí ke tagéna, Itewe náinoreq náníbáqmarinseq móe.

35 Maniká awahbeh arámbéhrí mirao kewé náníbáqmari móe. Náinahnoreh wóe. Náinoréh wóe úwe.

4

Ayu suitabéyabe pabeqme ehwéhne.

(Mátíyu 13.1-9, Árúka 8.4-8)

1 Sísaga káwehu ayehráq tunse mó síwáhnorúwe. Síwáhnorúwara íregárita q weba sáhátí púana wega wánípeq ko sipípeq kibekue tútuue míowe. Tútuue míowara moke mío kega arahwéraq míowana

2 wega áhnte pabeqme ehwéh síwáhnorúwe.

3 Síwáhnoréna, Teiníboq írátíáhro. Ayu suitabé aninká ayu suitabanieéna pokire.

4 Suitabehta q mó ayú ahta q megirana kabaranka sésiq nehre.

5 Mó ayú kirura q megirana pehgáriq marákó kéh púana mi ayú apubúue kiapoue kíréhre.

6 Anotah patáhitáq tamurupague ánúq piéh púana ehyatagire.

7 Mó ayú náwe tarúítáq megirana náwe kirena kárígariirana íre kawerue kíréhre. Minayabe sera íre íyéhre.

8 Mó ayú kaweq marákóráq megirana kiapoue kirena áhnte será íyéhre. Mó ayú 30

íyéhra na mó ayú 60 íyéhra na mó ayú 100 íyéhre.

9 Íre parosa áhréákáq kéó, kawerue íráhro úwe.

Sísaga ayu pabeqme ehwéh áwahe pahsuo ehwéhne.

(Mátíyu 13.10-17, Árúka 8.9-10)

10 Áhnte kegá íre míóta q airápété téhranité Sísá kéro kereq mitaq mío kereqka pabeqme ehwéhnsabé áwahe kasenuwe.

11 Kasenuwana Sísaga sensabé, Manikánka wahnah wahnahnirabeqte éhwéhmé áwahe ite sokigi aiena mó ke peh pabeqme ehwéh teri terinuge.

12 Minayabe mó kegá siuranka tagéra sirupeq íre tagariahrahowe. Sene siahrega irera sirupeq íre írátíahrahowe. Minayabe sene ahabábáq sansa peh kéhrana Manikánka sene ahabábáq íre kaweraritena peh ahraq matiankehe úwe. (Aisaia 6.9-10)

Sísaga moke pabeqme ehwéh teriunsabe irarú ehwehne.

(Mátíyu 13.18-23, Árúka 8.11-15)

13 Sísaga sensabé mó mahraréna, Ite mah pabéqmé éhwéh íre iraho? Mó pabeqme ehwéhmé árahue iranéhbo?

14 Ayume Manikáne kaweq ehwéhne. Ayu suitabé aninká mi kawéq éhwéh teri terinire.

15 Ahtapeq megi ayúmé wehukega Manikáne ehweh íráhwana owainawanka sirupeqté mi ehwéh apubúue seaebóire.

16 Kiruraq megi ayúme apubúue kiapoinserah wehukega Manikáne ehweh irera sirupipeq eyoyóera apubúue kowe atáhwe.

17 Manikáne ehwehnka sirupipeq íre ánu piéhnsábé pehgáriq tanáhráq sehgiówe. Manikáne ehweh sehgiónsábé mó kegá síwioqnahwana íre kaweq sunúq sire. Mi tanáhráq sega apubúue túbáh agéra Maniká áúwáhwe.

18 Náwe tarúítáq megi ayúme wehukega Manikáne kaweq ehwéh irera sehgionehe iwíáhéra

19 mah marákó marákóipéqté náneqsabé iwíáh kikiréra sene áhnte matíáh ménsáméhnsánsábé sirutaboiorwana mó mensáméhnsánsábé aigará pabekire. Náwe soagirana sera íre iyéhmé mi kegá Maniká awahbeh sansá íre sehgiowe.

20 Kaweq marákóráq megi ayúme wehukega Manikáne ehweh irera sirupipeq tábúsoqme iwíáhowe. Kaweq marákóráq kaweq será iyéhnserah sega mi ehwéh sehgiara Manikáne arambehri kawerue miraowe. Kawerue miraéra mó kegá 30 tahnsá árámbehríowara mó kegá áhnte 60 tahnsá kaweq arámbehríowara mó kegá peh íregáritaq 100 tahnsá áhnte kaweq arámbehríowe úwe.

Sísaga téhreh naneq íre akariaráhnsábé pabeqme irarú ehwehne.  
(Árúka 8.16-18)

21 Sísaga sensabé mó mahraréna, Áráhmu mewe setaq eheq maraho? Antehyataté áráhmu íre akariaráhwe. Máhriq tahbé tehnopeq íre maráhwe. Írakaumo. Kawerue téhrankeheéq peh tahberapeq maráhwe.

22 Amahnága moke kopípeq kéh náneqme mókake ábóraq kanae. Moke akariuríéh náneq moq ábóraq kanae.

23 Íre parosa íáhréákáq kéó, kawerue íráhro úwe.

24 Sísaga sensabé mó mahraréna, Itega íréhra ehwéh iwíáhue íráhro. Itega mó ke náriranserah Manikánka mina tahnsanue náinkéhe.

25 Matíéh áni Manikánka mó náwinkéhe. Íre matíéh ánimé Manikánka wene pehgáriq naneq meyankehe úwe.

Ayu kíréhnsábé pabeqme ehwéhne.

26 Sísaga mó mahraréna, Manikánka wahnah wahnahnime wehukenínká ayu marakóipeq suitabehnserahne.

27 Inokáhpeq sugayugaéna ahbiahipeq irigéna wene arambehrirana ayume kiapoue kíréhre. Kiapoue kíréh sánsámé suitabeh anínká íre ahtebehre.

28 Marakóga mirainka ménsámehnsá kirena iyéhre. Ebeq ánáh kiapoue kirena anehe sera iyena nera kéhre.

29 Ménsámehnsá nera kéhtáq pokatate serame apiwe meyáhwe. Nera kéh púara apiwe meyáhwe úwe.

Pehgáriq ayúnsábé pabeqme ehwéhne.  
(Mátíyu 13.31-32, Árúka 13.18-19)

30 Sísaga mó mahraréna, Manikánka wahnah wahnahnime aneq tahnsáne teinínkono? Minayabe aneq pabeqme ehwéh teinínkono?

31 Manikánka wahnah wahnahnime sotápéq uqmaréh ayu tahnsane. Mi ayúme íre mó sotápéqté áyú tahnsane. Írakaumo. Mi ayúme pehgáriq ayúne.

32 Wehukenínká mi pehgáriq áyú wene sotápéq uqmatairana kirena anotah awánká úkéna moke mó ménsáméhnsá kiotaikire. Awankánirana anotah ayáhnáwé kéhrara kabamarínká ayahnaweraq surahéra sene nah mitaq áhpeq píáhwe úwe.

Sísaga peh pabeqme ehwéh teriu ehwéhne.  
(Mátíyu 13.34-35)

33 Sísaga áhnte mina tahnsa pabeqme ehwéhne Manikáne ehweh teriuwe. Sirupipeq mi ehwéh iwíáhue irahráhunserahnue teriuwe.

34 We kéro keyabé epéq moke pahsuqme síwáhnoréna peh mó keyabé pabeqme ehwéh teriuwe.

Sísaga irarúnka sóiriq táqnáigú ehwehne.

(Mátíyu 8.23-27, Árúka 8.22-25)

35 Mi wehekáh tupekinaútaq Sísaga we kéro keyabé, Káwehu seberaebéq pokonehe úwara  
36 we kéro kega mibeq sáhurió ke suera Sísá mío sipí kéwewera Sísá meqmera kuwe. Mó sipíwárinkákák moráráq kuwe.

37 Anotah soíríruwana wáninka sípiipéq kiegambéh agu aguúwana sípiipéq wání obenkíkinaútaq

38 Sísawe sipí ambarupéq ayahqno kunubaraq sugowe. Sugowara sega Sísá iriatera wensabé, Íwáhnoraníno, ite wánípipeq pukonehe únayabé anetaníbo iwíáhono uwe.

39 Uwana Sísaga irigéna sóiriqsabé, Táqnáigúno éna wánínsabe, Pehwehrué mé túbáh agúno úwana sóiriqka táqnáigúwana wáninka moq túbáh agúwe.

40 Túbáh agúwana wega sensabé, Aneqsabé áhreo? Aneqsabé ínénsabe íre aiq pútare aintaho úwara 41sega anotahtaq áhreéra seye náhenéra, Mah anímé insebo? Sóiriqkakák wáninkakaq wene ehweh íréhre uwe.

5

Sísaga owainawamarí kaqsuo ehwéhne.

(Mátíyu 8.28-34, Árúka 8.26-39)

1 Sísareq we kéro kereqka sipí kéwewera kure Kehrari kawéhu seberaebéq Kérása kené marakórápéq kuwe.<sup>5</sup>

2 Sísá sípiipéqté tueagúwana mibeqté anímé owainawanka subiqmaq subiqmarú aninká wehuke maisia ónámáripéqté séna weba súwe.

3 Mi aninká maisia ónámáripéq kaegaeuwara wehukega wene aigárátáq ayahnkaratáq séniraté táhru táhru aruqaruruwana suraqsu suraqsurú púara íre saiqnariahrahuwe.

4 Wene ayahpíte séní sabirue surasuq surasuréna wene aigárápíté séní piteruq piterurúwe. Segá táhtorótaq íre ambubu atiahrahuwe.

5 Inokáhpeqkakák wéhékáhnkakaq ahriahri we maisia ónámáripéqté sáwéhrapeqté kare kareéna kenkawéhrate wene anonka amurúruqme kirasuq kirasurúwe.

6 Sísaga sípiipéqté kiuwana mi aninká móbeqte we tagéna pehbeheráh weba sure wensabé áhtó púana arehunserarác sewíowe.

7 Sewéna kareéna, Sísao, are íopeqté Manikáne ahninkáwá wóne. Aneraintaníbo? Íopeqté Manikánka tagariéhtáq níeraníneho úwe.

8 Sísaga wensabé, Owainawano, we auwe pokúno atonsabe mi ehwéhnsabé kareúwe.

9 Kareúwana Sísaga wensabé, Arenáwíq tenio úwana mi aninká, Ite áhnte mionayabé néníwíq Íregáritare éna

10 Sísansabé, Ite mahtaqté kaqme íre wahto eqmaq iuwehneho úwe.

11 Wahtotaq sáwéhrapeq íregáritaq poeráhqká náwe sahtaqme nowara

12 owainawamarínká Sísansabé, Mi poeráhqmáripá eqmaq iuwo éra, Póeráhqne sirupipeq míanehboq ite pokoro aito éra pagu pagunuwe.

13 Pagu pagunuwana Sísaga kowe aritowara owainawamarínká wehukení auwera póeráhqmariné sirupipeq kowíowara 2táhúséni (2,000) póeráhqmárinká sáwéhrapeqté pehbeheráh tunse mentúpipeq wáninkuwe pukuwe.

14 Póeráhqtaq wahnahnu kegá tagéra pehbeheráh pokue sotápéq mío kereq sene nahtapeq mío kereq koreríuwara seraganehéera suwe.

15 Sísaba suwana owainawamarí kaqauwo aninká kaweq iwíáhorahéna aneranerue tútuue míowara su kegá tagéra áhreuwe.

16 Áhreuware tago kegá kawerato ehweh su ke teriera póeráhqmari puku ehwéh teríuwara

17 sega Sísansabé, Itene marakó sue pokúno éra pagu pagunuwe.

18 Sísá sípiipéq kiasague pokinaútaq owainawamarí kaqauwo aninká wensabé, Íné are kieraníe úwe.

19 Kieraníe úwana Sísaga ahqáho atena wensabé, Arenawahpeq pokue íné arene

Wahnahnka arensabé nirutaboírue kawerato éhwéh arenawahrah korerio úwe.

20 Úwana wega pokue Tékapórísa marakórápéq mó ke suwahpeq mó ke suwahperue Sísaga we kawerato ehweh koreri terinuware moke író kega áhtenuwe.

<sup>5</sup> (5.1) Kérása marakó mó awíq kéhre. Mátíyuga sehiranú pukúipéq marakó awíq Kárarae kéhre. Mátíyu 8.28 tagáhno.

Sísaga awahre iní kaweratená ahrari oganúq ato ehwehne.  
(Mátíyu 9.18-26, Árúka 8.40-56)

21 Sísaga sípi kéwewena kure Kehrari kawéhú seberaebéq seuwekúwara áhnte wehekékéq weba sáhuriówe. Káwehu ayehráq míówana  
22 Asiu kené momiwí nahtápéqté wáhnáh ání Sáírúsaga mitaq séna Sísá tagéna áhtó púana wene aigárápí káuqmunue arehunseraráq ména wensabé,  
23 Nániyahu pukinaire. Wenaneq koráhtoréhna kaweraginkehboq máho. Oga míankehboq máho éna pagu pagunúwana  
24 Sísaga we kérowe.

We kérowara áhnte kegá moráráq kure Sísá kú ahtápéq we pehentáruq we pehentáruue kuwe.

25 Awahre iní kure airápété téhtaré ópéq áhnte ópéq wene korahq íre taraqnágia peh tuerueúwe.  
26 Peh tuerueúwana wega áhnte sotéh kébá poku pokuúwara sega we áhnte érawúwana wene móne sinsinue parabaruowana íre kaweragúwe. Írakaumo. Anotah íroke awáhréúwe.  
27 Mi iníká Sísá éhweh irena áhnte kegá moráráq kutaq  
28 wewe náhenéna, Íné peh wene korósi koráhtoráhnaraqmé kaweraintankéhe úwe.  
29 Áhnte wehekékéqká kígiúwana awahre iníká Sísá anehepeq sure wene korósi koráhtorowe. Koráhtorowana wene korahq apubúue taraqnágúwana wene arupipeq iwíáhéna, Íné aiq kaweraintéhre úwe.

30 Úwana Sísaga iwíáhéna, Ínéga inse kawerauwogo éna pabeqme, Néne korósi insega táhtorehro kasenúwe.

31 Kasenúwara we kéro kega Sísansabé, Áhnte kegá are paguno púah aneqsabé, Néne korósi insega táhtorehro eno uwe.

32 Uwana Sísaga táhtoro aní taganieéna aurankaúwe.

33 Kawerato iníká, Íné aiq kaweraintéhre éna áhre iransánéna Sísaba sure arehunseraráq sewéna moke teawuwe.

34 Teawuwana Sísaga wensabé, Náinahnoo, arega aiq pútare aintahnaga kaweratóge. Are awaho ani míaniewóne. Pehwehrue pokéwahno úwe.

35 Pehwehrue pokéwahno úwara wahnah aniné nahtapeqté táhmaro kegá sure abowansabé mahraréra, Areniyahu aiq pukire. Ai q puki puah síwáhnori aníká sinsabé ahqáho ato uwana

36 Sísaga sene ehwehnsabé íre iwíáhia abowansabé, Íre áhreúno. Peh ai q pútare ainto éna

37 áhnte we kéro keyabé, Mahtaq míáhro aritena peh morá téhq abáráhré Sémísireq Sónireq mó aní Pítareq meriqmena pokúwe.

38 Pokue mi wahnáhné nahtapeq sutaq irobibiu ke tagówara áhnte ibiséra anotah ibítúnátúnánuwe.

39 Ibitunátúnánuwana Sísaga nahupeq kibekéna irobibiu keyabé, Aneqsabé áhnte ehwehnéq ibitunátúnánoo? Mah ahrárá íre airai q pukia peh sugéhre úwara

40 sega awiréh atówe. Awiréh atówana Sísaga ómi míó ke máhpeq kaqsuena mi ahráriné anoiboreq we kéro kereq meriqmena ahrarine máhriqtapéq pokúwe.

41 Pokéna wene ayahnkara táhtotawéna wewene ehwehta q mahraréna, Tarita kumie úwe. Tarita kumie úmé, Ahrario, ínéga teawúge. Irigúno úwe.

42 Irigúno úwana wega apubúue irigéna ah noguwe. Mi ahráriné ópeqme airápété téhtaré ópéq míotaq pukuwana Sísaga iriatowe. Iriatowara tago kegá áhtenuwana

43 Sísaga sensabé, Mó kegá íréhboq íre teriéro éna wenanoibonsabé, Iteriyahu táhutahuq náwétao úwe.

6

Néhsara suwahpeqte kégá Sísansabé suwahrío ehwehne.  
(Mátíyu 13.53-58, Árúka 4.16-30)

1 Sísaga mitaq suena wenawahpeq pokúwara we kéro kega kérowe.

2 Ahrena ahrena wehekáh Sísaga Asiu kené momiwí nahtápéq síwáhnorúwara áhnte író kega áhtenuwe. Áhtenéna mahraréra, Wega irari ehwéhmé eheqte ehwéhpo? We árahue ahtebia ání úkurairo? Wega ótaq sansámárá árahue mirairo?

3 We peh nah pe tagaríéh ání míre. We Máhríane ahninkáwá wíre. We Sémísireh

Sósépareh Súrásareh Sáimónirehne siwahwá wíre. Wenanahnoreh mahtaqté ánimáí móe éra wensabé abiahnsa atówe.

4 Abiahnsa atówana Sísaga sensabé, Manikáne ehweh irari anínsábé mó ke suwahpeqte kégá iwíáh iwíáh atáhwe. Peh morá wenawahpeqte kéreq wenawahrahreq wene nahtapeq kaegaeo kereqka wensabé íre iwíáh iwíáh atáhwe úwe.

5 Mibeqté kégá wensabé íre aiq pútare ató púana wega mitaq ótaq sansá íre áhnte miraorahúwe. Peh táhmaro awahré ké táhtorena kaweraritowe.

6 Wensabé íre aiq pútare atónsabe Sísaga áhtenúwe.

Sísaga we kéro ke arambehrireq eqmaq suo ehwehne.

(Mátíyu 10.5-15, Áruká 9.1-6)

Sísaga mó kehiná suwahpeq mó kehiná suwahperue kosíwáhnorúwe.

7 Wegá we kéro ke airápété téhranítéyábé síáhrabéna mó mi aníté mó mi anítéue eqmaq

suowe. Eqmaq suanaútaq owainawamarí kaqsuageheéna wega págege aritena

8 sensabé, Ite ahtapeqsabé tópahme unahmé mónewe íre meyháro. Peh morá pegiqnáhnkara meweq

9 súu sukiwe pokoro. Téhtaré síótí íre sukióro.

10 Ite mó ke suwahpeq kirataq peh morá aníné nahupeq kaegaeoro.

11 Wehukegá ite íre mehweh aitera itene ehwehnsabé iwahriehre irataq sene nah sueq itene igárátáq kahna tanáhúq poruarueq pokoro úwe.

12 Úwara eqmaq suo kega pokue mó kehinánsábé mahraréra, Kaweritankéhboq itene ahabábq sansa sueq kaweqtaq míáhro teri terinuwe.

13 Segá áhnte owáináwámáí kaqsuera awahre ke óríwi awánká sérá ano abaq sitera kaweraritówe.

Sóni wání meri merinú aní pukú ehwehne.

(Mátíyu 14.1-12, Áruká 3.19-20, 9.7-9)

14 Sísá éhweh mitaq teri mahtaq terinuwana anotah wahnáh aní Érótiga irowe. Táhmaro kegá iraréra, Sóni wání meri merini aní pukéna mó oga úkurai puana amahnága págege otáq sánsánire uwe.

15 Uwara mó kegá, We Éráisa wire uwara mó kegá, We Manikáne ehweh irari anímé naho Manikáne ehweh iraru ke tahnsa aní míre uwe.

16 Uwana Érótiga Sísá éhweh irena mahraréna, Ínéga ayahqno kiraq áúwátáu anímé Sóni we mó oga úkuraire úwe.

17-18 Sóni oga míotaq wega Érótingsabé ehweh atena mahraréna, Arenábáqne ahre meronawe Mósísiga sehgióro ú ehweh aiq anterutone úwe. Érótiga wenábáq Pírípine ahre Éróriása meyonsabe Sóniga wensabé ehweh atowana meyo inínká mi ehwehnsabé ayehitónsabe Sóni abiahnsa atowe. Abiahnsa atowana Érótiga sóntía keyabé, Sóni táhtoqme karábúsiipéq móátáhro úwara táhtoqme karábúsiipéq móátówe.

19 Móátówana mi iní Éróriásaga Sóninsabé abiahnsa atataú púana Sóni subiq suaní iwíáhúmé íre miraorahúwe.

20 Érótiga Sóninsabé áhtenéna iwíáhéna, We íre ahabábq ani peh kaweqtaq mía míai aní míre éna, Pehragahro únsabe mó kegá Sóni íre subiq suahráhuwe. Érótiga Sónine ehweh irotaq iwíáh kikiréna peh Sónine ehweh ireyabe awahbówe.

21 Érótine anowagá we maqmio ahrreraq ko tanáhráq sútaq wega anotah tahutáhúq kawerarena wahnah wehwárinseq sóntía wahnáh wéhwárinseq Kehrari marákórápéqté áhnte moné ko wehwárinseq kirabo aritowe.

22 Éróriásane ayahunkawagá seba séna ábáhrúwara Érótireq weba táhutahuru kereqka ábáhrúnssabe áhnte iwíáh iwíáhuwe. Minayabe Érótiga mi ahráryábé, Arega nánio ina naneq náwinie.

23 Pópoqnahga tagaríéhtáq aiq pútariahnsanuge. Arega nánio ina naneq náwinie. Wahnahnu naneqsabé ákáhtaq nánio inaraqmé náwinie úwe.

24 Úwana ayahunkawagá tueyokue wenanonsabe, Aneq nánio ininkono úwana wenanoga, Sóni wání meri merini aníné ayahqno nánio úno úwe.

25 Úwana wega pehbeheráh kibekéna Érótingsabé, Íné Sóni wání meri merini aníné ayahqnonsabe níre. Amahnága kunubaipéq maqme nánio úwe.

26 Nánio úwana Érótiga mi ehwéh irotaq wene arupipeq áhnte umeh agúwe. Pópoqnahga tagaríéhtáq awinauge ú púana wene arupipeq iwíáh kikiruwe. Ínéreq táhutahuro kegá néne ehweh íráh púana niyehitéhneho éna, Mi ahráryábé íre ahqáho atahráhuwe.

27 Minayabe wega sóntía anínsábé, Sónine ayahqno kogiraqme mewe súno éna apubúue eqmaq suowana tunse karábúsiipéq Sónine ayahqno kiraq suowe.

28 Kiraqme kunabaipeq maqme mewe séna mi ahrári awuwana wenano móawuwe.

29 Sóni kéro kega we subiq súo ehweh irera sure wene anonka sesehgiwera maisia ónápípeq móarówe.

Sísaga 5 táhúséni (5,000) weh kiraboú ehwehne.

(Mátíyu 14.13-21, Árúka 9.10-17, Sóni 6.1-13)

30 Sísaga eqmaq suo kega weba kouwekéra sega mirau ehwéhnkákákq síwáhnoru ehwéhnkákákq moke teawúwe.

31 Íregárita qéra séra unsabe Sísareq we kéro kereqka íre táhutahurorahu puana Sísaga sensabé, Máhoro. Ahrenagehboq itebataq abatapi pokonehe úwe.

32 Minayabe sípi kéwewera kure sebataq abatapi pokuwe.

33 Pokuwara áhnte kegá sípi tagéra, Sísareq we kéro kereq aiq tagóne éra sensuwahpeq suera peh marakóipeq pehbeheráh kure Sísaga kinaúrabeq kuwe.

34 Sísaga koráwégútaq áhnte wehekéq tagéna sensabé arutaboairaritowe. Íre wahnahnkákákq sípísípíq tahnsa mío púana sensabé arutaboairaritena áhntetaq síwáhnoruwe.

35 Ío tupekinaútaq we kéro kega Sísaba séra wensabé, Mótaq penkinae. Mahtaq peh abatapi púah

36 mah kegá so kéh márakórácq wahtotaq kehiná suwahpeq táhutahuq kobaiqmaragéhboq eqmaq suo uwe.

37 Uwana Sísaga sensabé, Itega mah ke táhutahuq kirabooro úwara sega wensabé, Ite áhnte moné 200 Kína mewe q páréti kobaiqmaqme kiraboonehnkono uwe.

38 Uwana wega sensabé, Páréti árahue kehro? Koragahro úwara sega kosáhnshera Sísansabé, Párétiwe moberíah kéhre. Pahme téhtaré kéhre uwe.

39 Uwana Sísaga mío keyabé, Narunarunitaq isepí kiria mahpi kiriaue tútuue míáhro úwara sega miraué tútuue míówe.

40 Áhnte ke 100 wehekéq morabí isepí tútuue mía 50 wehekéq morabí mahpi tútuue míauwe. Miraué kiranéhnué tútuue míówe.

41 Sísaga mi moberíah párétiákákq téhtaré páhnkákákq mewena íópeq tagéna Manikánsabe, Kaweróne atena páréti keqme we kéro kega kiraboigeheéna náriuwe.

42 Náriuwara ómiga nowana siyahbankirowe.

43 Siyahbankirowara páréti arahqkakaq pah arahqkakaq airápété téhtaré páhsíkétí úsawe obenkíq márówe.

44 Mi tahutáhúq no wehwé íregárita q 5táhúséni (5,000) weh wóe.

Sísaga káwehu wání abobóráhtaba nogu ehwéhne.

(Mátíyu 14.22-33, Sóni 6.16-21)

45 Míowana Sísaga we kéro keyabé, Sípiipéq kiasagoro. Seberaebéq ite nonótáh Pétásáira suwahpeq pokoro éna apubúue eqmaq suena mío keyabé, Iteruwahpeq pokoro éna

46 mitaq suena púrerinieéna sáwéhrapeq kiuwe.

47 Penkútaq we kéro kega sípiipéq káwehu ákáhpi míowana Sísaga webataq marakóipeq míowe.

48 Míowara siuratapeqté anotah soirírúnsabe awankátate wání subame kéra ahyanahyanuwana sóiriqka saiqnówana tagówe. Ahyahbinkerotaq Sísaga wání abobóráhtaba seba kure kótaikinaútaq

49 sega we tagéra, We wahnsa wíre íwíáhéra kareuwe.

50 Ómiga we tagéra anotah ahréera kareuwana Sísaga sensabé, Pehitaaq míáhro. Íné úge. Íre áhreoro úwe.

51 Sísaga sípiipéq kiasagéna sereq kiwíowana sóiriq táqnáigúwara sega anotah ahténuwe.

52 Áhtenéra páréti keqme kiraboúnsabe sirupipeq íre iwíáhia peh íre irasa míówe.

Sísaga áhnte awáhré ké kawerarito ehwéhne.

(Mátíyu 14.34-36)

53 Sega sípiipéq kure seberaebéq kéráwégue Kénésáréti marakórápéq kure mitaq sípi

arahwéraq móarówe.

54 Móarówara míó kega tagéra, Sísá wire éra

55 pehbeheráh sensuwahrahba pokue, Sísá míéhre mitaq teri mahtaq terinuwara awahre ke sene máhriqkakák meriqmera weba mórítówe.

56 Sísaga moke mi ke suwahpeqkakák moke táhúnipéqkákák úpeqkakák nogutaq sega awahre ke máhkétirapéq mórítówe. Móritera Sísansabé pagunera, Awahre ke arene korósi aiq táhtoragéhe uwara wene korósi táhtoró ke moke kaweragúwe.

7

Manikáne ehwehnka iteinahbúréhne sansá kiotaikire i ehwéhne.  
(Mátíyu 15.1-9)

1 Péhrasi kereq Mósísine ehweh síwáhnoro kereqka Sarúsarama suwahpeqte sure Sísaba sáhatiówara

2 we kéro kega siyahnkara íre pabeq paberia pehipi nowara tagowe.

3 Péhrasi kereq moke mó Asiu kereqka sinahbúwárehne sansá sehgiro puara ahriahri ebeq siyahnkara pabeq paberaruera anehe táhutahuq aruqaruruwe.

4 Máhkétirapéqté séyéutaq sega ebeq mósosuera anehe táhutahuwe. Segá sinahbúwárehne sansá áhnte mó sansá miraéra káhpuwe antehyamé tiniwe pabeq pabeq aruqaruruwe.

5 Péhrasi kereq Mósísine ehweh síwáhnoro kereqka Sísansabé kasenéra, Iteinahbúréhne sansámé are kéréh kégá aneqsabé anteruera peh náwiqkakaq síyáhnkárátáté táhutahuq naho uwe.

6 Uwana Sísaga sensabé, Itewe peh kopérahpéro ke wóe. Manikáne ehweh irarú ani Áísáíaga naho Manikáne ehwehnka mahraréna,

Mah kegá nénéwíq síwéhrate pankerera peh sirupipeq ínénsabe íre suwahbehre.

7 Segá wehukega sehgióro e ehwéh síwáhnoréra, Mahnawé Manikáne sansáne ewe.

Minayabe sega ínénsabe péhepehe iwíáh iwíáh aintáhwe úwe. (Aisaia 29.13)

Itega miraonsabé púkuipéqté éhwéhnká aiq irarire.

8 Itega Manikánka sehgióro ú ehweh sueq peh wehukene sánsá ambubu atawéq sehgirowe úwe.

9 Sísaga mó mahraréna, Iteitene sánsá sehgióneheéq Manikánka sehgióro ú ehwehnsábé anetaníbo éq anterúáhwe.

10 Mósísiga naho mahraréna,

Iteinoibone ehweh ireq se séhréh arítáhro úwe.

Wega mó mahraréna,

Wenanoibonsabé íre kaweq ehwéh aritéh ání subiq súáhro úwe.

(Kisim Bek 20.12, 21.17)

11 Manikáne púkuga miraue irariraq itega síwáhnoréq, Wehukénká wenanoibo séhréh aritahráhi monébópoq mó naneqpopoq matawéna wenanoibonsabé mahraréna, Mahnawé Maniká íre áwátáutaq tahirímé náiyú irino ire.

12 Wehukénká miraue irariraq itega, Mi anínká wenanoibonsabé anetaníbo ime aiq kawerire. Wega se íre séhréh aritéhmé aiq kawerire ewe.

13 Minayabe iteitene ehweh sehgiónsábé Manikánka sehgióro ú ehweh anterúáhwe. Mahna tahnsa sánsá áhtetaq mira aruqaruréq mó keyábé, Itene sánsá sehgióro arítáhwe úwe.

Sísaga, Wehukéniné arupipeqté iwíáhgá ahabáratáhráhire ú ehwehne.  
(Mátíyu 15.10-20)

14 Sísaga mónkakák mitaq míó keyabé, Ínéba sewíáhro. Ite ómiga néne ehweh ireq iwíáhue tagahro.

15 Wehukénká táhutahurinka íre ahabáratéhre. Írakaumo. Peh morá wene arupipeqté iwíáhgá ahabáratáhráhire.

16 [Ahreakaq kéó, mah ehwéh írátíáhro úwe.]

17 Sísaga weba sáhatío ke suena nahupeq kibekúwara we kéro kega mi pabéqmé éhwéhnsábé kasenuwe.

18 Kasenuwana wega sensabé, Ite moq íre írátíaho? Wehukénká táhutahurinka íre ahabáratéhre. Minayabe íre iraho?

19 Táhutahuqka wehukéniné iwíáhipeq íre túíre. Peh ahmbiupipéq tunse tueagire úwe. Sísaga mah ehwéh irarúme, Moke táhutahuq nah naneq mire úwe.

20 Sísaga mó mahraréna, Wehukéniné arupipeqté íwíáhgá ahbabáratéhre.  
 21 Wehukéniné arupipeqté, wene iwíáhipeqté, ahbabáq iwíáh áhwárehre. Íre kaweq iwíáhwé, mahbi ahrari abariéwé, aebówé, wehuke subiq suewé,  
 22 mó aníné ahre weh abariéwé, mó aníné ménsámehnsánsabe aigará pabekime, íre kaweq sansámé, péhepehenéwé, íre mirao naneq miraime, mó anínsábé íre kaweq iwíáh atewé, éhruruéwé, píribahriéwé, saiyoéwé,  
 23 moke mah ahbábáqmé, wehukéniné arupipeqté áhwárehre. Mahnawarinká wehukení ahbabáratéhre úwe.

Nahnso inínká Sísansabé kawerue aiq pútare ato ehwéhne.  
 (Mátíyu 15.21-28)

24 Sísaga mitaq suena Táíya suwahpeqte kéné marakórapeq pokúwe. Pokéna nahupeq kiena, Íné mahtaq míónsábé mó ke teriyeho úwanawe we kopípéq íre míahrahúwe. Írakaumo.  
 25 Owainawanka wene ayahunkawa subiqmaq subiqmarú inínká Sísá míéhre u irena apubúue sure Sísansabé áhtó púana wene aigarátáq arehunseraráq sewíowe.  
 26 We mitaqté náhnsó inínéna Káríki ehwéh iro iní míre. Wega Sísansabé, Nániyahu subiqmaq subiqmari owáináwá segasuo teawuwe.  
 27 Teawuwana Sísaga wensabé, Ebeqme animárínká táhutahurigehe. Sene táhutahuq mewe iamáripá tuparuéwé íre kaweq sansáne.  
 28 Úwana wega Sísansabé, Anotah aníno, arega irarénawe aiq pútaróne. Iamarínká animáríné siyahpíte megí apípí tahbe tehnopeqte mewe nahtaq sibowágá íre kaqsúéhre úwe.  
 29 Úwana Sísaga wensabé, Arega irarénayabé seuwekúno. Owainawanka areniyahu aiq auwena pokire.  
 30 Aiq auwena pokire úwana wene nahtapeq pokue tagówana owainawa kaqauwo aní aiq auwawana wene máhriqtaq awahoraq míowana tagówe.

Sísaga ahre parosa íre ehwehnorahi aní kawerato ehwehne.

31 Sísaga Táíya suwahpeq suena Sáíróna suwahpeq kótaikéna Tékápórísa marákórápéq tuena Kehrari kawéhútáq kúwe.  
 32 Mó kegá ahre parosa aní íre kaweq ehwéhnú ani Sísaba meqmera suwe. Segá Sísansabé, Kaweraginkehboq arene ayahnkaratáté táhtoro uwe.  
 33 Uwana Sísaga mi aní meqmena mipi sáhurío ke suena móbeq pokue wene ayahnobeqtaté mi aníné ahreipeq paroqmatawéna anehe wene ayahnobeqtaq tehqniarena mi aníné anehbíraq marena  
 34 íópeq tagéna ahyannahanéna ahre parosa anínsábé mahraréna, Épátae úwe. Mi ehwéhnumé, Ahre sio úwana  
 35 wene ahre siatowana wene anehbí kaweragúwana wega kaweq ehwéhnúwe.  
 36 Sísaga sensabé, Mó ke teriyeho úwara sega mó ke teriúnsabe wega teriyeho uge úwara sega áhnte mó ke teri terinuwe.  
 37 Mi ehwéh író kega anotah ahténéra mahraréra, Wega moke kawerue miraire éra ahre parosa aní iro atéhre. Íre ehwehnorahi aní ehwehnúno atéhre uwe.

8

Sísaga 4 táhúséni (4,000) weh kiraboú ehwehne.  
 (Mátíyu 15.32-39)

1 Mitaqkake áhnte kegá Sísaba sáhatiówana se táhutahuq íre konsabe Sísaga we kéro keyabé síáhrabéna sensabé,  
 2 Mahtaq míáh kégá ínéba apahtáro wéhékáh míáhnsábé amahnága se táhutahuq íre kéh púana sensabé nirutaboíruge. Íre kirabo aritasa pehipi eqmaq súáhnaraq ahtapeq siunúnkaq surahiyeho. Pehipi íre eqmaq suaníe.  
 3 Sene nahtapeq eqmaq súáhnaraqmé sirupibiyabé ahtapeq siunúnkaq márunsurahoneherawoe. Táhmaro míáh kégá íre wahtopeqte surowe úwe.  
 4 Úwara we kéro kega wensabé, Mahtaq peh abatapi míre. Mah ke awehraq tahutáhúq nagehboq árahue áhnte tahutáhúq meyhárahuno uwe.  
 5 Uwana Sísaga sensabé, Árahue paréti kehro úwara abapete téhtaré kéhre uwe.

6 Sísaga weba sáhurió keyabé, Marakóraq tútuoro éna mi abápété téhtaré páréti mewena Manikánsabe, Kaweróne atena páréti keqme we kéro kega míó ke kiraboigeheéna siuwara sega moke míó ke náriúwe.

7 Segá táhmaro káriq pah kowana Sísaga Manikánsabe kaweróne atena we kéro keyabé, Minaakaq kirabooro úwe.

8 Kirabooro úwara míó kega nowana siyahbankirowe. Siyahbankirowara arahqmé abapete téhtaré páhsikéti úsawe obenkíq márówe.

9 Peh íregárita q wehuké 4 táhúséni (4,000) ke míówe.

Sísaga mi ke eqmaq suena

10 sípiipéq apubúue kiasagéna wereq we kéro kereq kure Tárámánúta marákórápéq pokuwe.

Sísansabé, Ótaq sansánúno u ehwéhne.  
(Mátíyu 16.1-4)

11 Péhrasi kegá Sísaba séra wensabé ehweh atera, Manikánka are séhréh atahna taganehboq íopeqté ótaq sansánúno uwe. Ótaq sansánúno éra we áhwárawe tagowe.

12 Áhwárawe tagowana Sísane arupipeq págege agúwana wega mahraréna, Amahnága oga miáh kegá aneqsabé ótaq sansá tagéyabe suwahbehro? Teiníboq írátíáhro. Segá ótaq sansá íre tagagehe. Ahqáho. Írakaumo úwe.

13 Írakaumo éna Péhrasi ke suena sípi kéwewena kéráwégue seberaebéq pokuwe.

Páréti muoráhi naneqsabé pabeqme ehwéhne.  
(Mátíyu 16.5-12)

14 We kéro kega páréti meweyabe sibitagúwara peh morá páréti sípiipéq kowe.

15 Sísaga sensabé págegeue mahraréna, Tagaríáhro. Péhrasi kereq Érótiqne páréti muoráhi naneq pehrahro úwe.

16 Úwara sega seye náhenéra, Ite páréti íre kéhnsabé Sísaga mi ehwéh teire uwe.

17 Uwana Sísaga sene ehweh ahtebéna sensabé kasenéna, Ite páréti íre kéh éhwéhmé aneqsabé sío síoo? Amahnága teiú éhwéh íre iraho? Itene irupipeq íre ahtebaho?

18 Itene iurame kéhraq íre tagariaho? Itene iahrewé kéhraq íre írátíaho? Ínéga mirauraume ite íre iahreraq kehro?

19 Ínéga 5 táhúséni (5,000) weh moberíáh páréti keqme kirabourautaq arahqmé árahue unáh úsawe obenkíq matoo úwara sega wensabé, Airápété téhtarée uwe.

20 Uwana Sísaga sensabé, Mó ke 4 táhúséni (4,000) weh abapete téhtaré páréti keqme kirabourautaq arahqmé árahue unáh úsawe obenkíq matoo úwara sega wensabé, Abapete téhtarée uwe.

21 Uwana wega sensabé, Minayabe ite amahnágaákákq íre iraho úwe.

Sísaga aura pira áni kawerato ehwehne.

22 Segá Pétásáira suwahpeq suwara mó kegá aura pira áni Sísaba meqme séra wensabé, Mah aní kaweraginkehboq arene ayahnkaratáté táhtoro uwe.

23 Uwana Sísaga aura pira áni ayahtaq ahmboqmena ahnansahrapeq pokéna wene aura tehqni atena ayahnkaratáté táhtorena wensabé, Aiq tagahno úwe.

24 Uwana wega tagéna, Ínéga nogó ké tagogana se awanká tahnsa nogówana tagoge úwe.

25 Úwana Sísaga ayahnkaratáté wene aurapi mó táhtorowana wega ebitáwéna wene aura kaweragúnsabe kawerue tagówe.

26 Kawerue tagówana Sísaga wensabé, Mah kehiná suwahpeq amahnága kouwekineho éna wene nahtapeq eqmaq auwowe.

Pítaga Sísansabé, Are Karáhé wóne ú ehwehne.  
(Mátíyu 16.13-20, Áruká 9.18-21)

27 Sísaga we kéro kereq meriqmena Sésaría Pírípái suwahpeq mitaq wahtotaq mó kehiná suwahpeqtaq pokinaúwe. Ahtapeq kutaq wega sensabé kasenéna, Mó kegá ínénsabe inse aintaho úwe.

28 Úwara, Arensabé mó kegá, Sóni wání meri merini aní míre ewara mó kegá arensabé, Éráisa wire ewara mó kegá arensabé, Manikáne ehweh irari aní míre ewe uwe.

29 Uwara Sísaga sensabé kasenéna, Itega ínénsabe inse aintaho úwana Pítaga wensabé, Manikánka ite meirena kaweraitankeheéna omaq ato aní móne úwana

30 Sísaga sensabé minayabe mó ke teríyeho úwe.

Sísaga, Íné pukéna oga úkinauge ú ehwehne.  
(Mátíyu 16.21-28, Áruká 9.22-27)

31 Sísaga we kéro ke síwáhnoréna, Íné wehukení úku aní níwíoqnaneherawoe. Asiu kené aboawah wehreq Manikáne ehweh mibeq mahbeq arítáh kéreq Mósísine ehweh síwáhnoro kereqka ínensabe, Iuwahriehre éra nubiq suaneherawoe. Nubiq suehrana íné pukéna apahtáro wéhékáhtáq iriwe oga úkinauge úwe.

32 Sísaga mah ehwéh pahsuqme irarúwana Pítaga we meqmena móbeq móatena wensabé awehgu atena, Arega iraréna ehwéhme aiq pútaragineho úwe.

33 Úwana Sísaga pabeqme we kéro ke tagéna Pítansabé awehgu atena wensabé, Owainawano, móbeq míahno atena, Arega iraréna ehwéhme Manikánka íre iwíáh atéhre. Minawé peh wehukene iwíáh wíre úwe.

34 Sísaga we kéro kereq moke míó kereqsabé, Ínéba sewíáhro éna, Íné sénireyabe awahbeh aníno, arerene awahbeh iwíáh suo. Manikáne arambehri mira aruqarurunsabé sega íné awankátaq táhparagéhe. Ínéga miraunserah miraue séniro.

35 Wewensabé arutaboíréna peh wewene awahbeh iwíáh mira aruqaruri anímé oga mérapeq íre awaq miahráhire. Néne kaweq ehwéh koreriena néne sánsá sehginieéna wewe awahbeh iwíáh susuri anímé oga mérapeq awaq miankéhe.

36 Wehukeníká moke mah marákóipéqté ménsáméhnsá matiéhtáq tahirímé oga mérapeq íre awaq miahnaraqmé mi mensáméhnsánká árahue séhréh atéh iripo?

37 Oga mérapeq awaq meyabe aneqtaté paiqmarankéhbo? Ahqáho. Írakaumo. Íre paiqmarahráhire.

38 Amahnága oga míáh kéga Manikánsabe íre suwahbehrra peh ahababáq aruqarurowe. Mah tanáhráq ínensabeákáq néne ehwehnsabeákáq ayehiteh anímé íné wehukení úku anínká túónagake mi anínsábé moq niyehitanawire. Nánibone patahga tahnsa téhreh naneqkakáq íné wehukení úku anínseq Manikáne íopeqte kéreqka túónagake mi anínsábé niyehitáhnana ahqáho ataníe úwe.

9

1 Sísaga mó mahraréna, Teiníboq írátíáhro. Táhmaro iriwe míona ke pehipi íre pukigehe. Ebeqme Manikánka págegeue wahnah wahnahnánaq tagéq anehe pukigehe úwe.

Sísane auranabiah mó kugú agú ehwehne.  
(Mátíyu 17.1-13, Áruká 9.28-36)

2 Sísaga síwáhnorúwana abapete morá wéhékáh parabagútaq wega Pítareh Sémísireh Sónireh sebataq meriqmena anotah sawéhrápéq kiuwe. Kiuwara mó kegá íre míowara sega tagotaq Sísane auranabiah mó kugú kaweq kugú agúwe.

3 Wene korósi patahga tahnsanue anotah tabérábé agúwe. Mina tahnsa tabérábéwé mah marákóipéqté ambanta pabeq paberi anínká íre miraorahire.

4 Éráisareq Mósísireqka íopeqte tunse ábóraragéra Sísareq ehwehnuwe.

5 Ehwehnuwana Pítaga Sísansabé, Íwáhnoraníno, ite mahta q mionayabé aiq kawerire. Apahtáro úqná pearanéhe. Arene morá, Mósísine morá, Éráisane moráue pearanéhe úwe.

6 Se anotah ahréu puana Pítaga íre iwíáhia pehipi irarúwe.

7 Irarútaq írábúyánka seubítíowana mipéqté éhwéhnká mahraréna,  
Mah anímé niruní nénáhní míre. Wene ehweh íráhro úwe.

8 Úwara Sísaga kéro kega apubúue aurankahnkaue tagowara mi anité íre míoyana peh morá Sísaga webataq sereq míowara tagowe.

9 Sávéhrapeqté tuegutaq Sísaga sensabé, Itega tagéq irewáh éhwéh amahnága mó ke teríyeho. Íné wehukení úku anínká pukéna oga úkonaraq terigéhe úwe.

10 Unsabe sega mó ke íre teriasa peh oga úkona ehwehnsabé seyega iwíáhue kasenuwe.

11 Kasenéra, Mósísine ehweh síwáhnoro kegá, Éráisa ebeq sinaraq anehe Manikánka omaq ato aní anehe sinae eme aneqsabé irareo uwe.

12 Úwana Sísaga sensabé, Éráisaga moke kawerinieéna ebeq suraire. Mó kegá íné wehukení úku aní níwíoqnéna niwiréh aintagéhe. Minayabe Manikáne púkuipéqté séhíránká

aiq teí mino?

13 Ínéga teiníboq írátíáhro. Éráisa aiq suraire. Púkuipéqté séhíránká aiq irarinserah mó kegá seye suwahbarai sansánéra we íre kaweratárówe úwe.<sup>6</sup>

Sísaga owainawa kaqauwena animai kawerato ehwehne.  
(Mátíyu 17.14-21, Árúka 9.37-43)

14 Sísareq apahranító we kéro kereqka mó Sísá tagaríáh kébá túwara áhnte mó kegá seba sáhuriówara Mósísine ehweh síwáhnoro kereqka se ehwehuwe.

15 Ómi mitaq sáhurió kega Sísá tagotaq áhtenárah pehbeheráh weba séra mehwehuwe.

16 Mehwehuwana Sísaga sensabé kasenána, Itereq sereq aneq ehwéhnoo úwe.

17 Se míórabeqte wéhgá Sísansabé, Íwáhnoraníno, nénahni areba meqme suge.

Owainawanka we subiqmaq subiqmarinsabé wega ehweh íre irahráhire.

18 Owainawanka we subiqmaq subiqmaritaq marakóraq tontehriparéhra arehya kiobinue áwéhraq nankiq nánkírirana wene anonka tawiróbana atia atiaire. Are kéréh kéyábé, Owainawa kaqauwááhro ugarawe sega íre miraorahowe úwe.

19 Íre miraorahowana Sísaga míó keyabé, Ite íre aiq pútare ainteq saiyo ke wóe. Iteba mía míaume ahkake awehraq kanabo? Itega miraonsabé nirupipeq umehime ahkake parabaginabo? Mi animái ínéba meqme sero úwara

20 meqmera móátówe. Meqmera móátówana owainawanka Sísá tagótaq mi animái kúrugúru atowana we marakóraq márunsurahéna tabenoráhbénoue arehya kiobinúwe.

21 Sísaga mi aniné abowánsabé kasenána, Arenahnimé téhwe ahkake miraurairo úwe. Úwana abowágá, Pehgáriq aní míaraitaq mirauraire.

22 Owainawanka we subiq suanieéna iraipéq áhtetaq susuréna wánípipeq áhtetaq susurire. Arega miraorahónawe arutaboiraite miraúno úwana 23Sísaga wensabé, Arega miraorahónawe ono? Manikánsabe aiq pútare atéh ánínká moke miraorahire úwe.

24 Úwana abowágá apubúue mahraréna, Aiq pútare atóge. Arensabé aiq pútare atómé íre awehraq kéhnsabé séhréh ainto úwe.

25 Úwana áhnte mó ke weba peheráh sure mipi sewiówana Sísaga se tagéna owainawansabé awehgu atena wensabé, Íre ehwehnia ahre parosa owáináwáno, mah aní auwe pokúno. Weba mó íre súno úwana

26 owainawanka ehwehnabaéna kúrugúru atena auwena pokúwe. Pokúwana mi animái pusa aní tahnsa míonsabe áhnte míó kega, We aiq putíéhre uwana

27 Sísaga wene ayahnkara táhtoqme iriatowana irigúwe.

28 Irigúwana Sísaga nahupeq kibekúwara we kéro kega wensabé, Itewe árahinsabé owainawa íre kaqsuahráhuo kasenuwe.

29 Kasenuwana Sísaga sensabé, Mina tahnsa pehipi íre kaqsuahráhowe. Peh púrerirataq kaqsuahráhowe úwe.

Sísaga, Íné pukéna oga úkinauge mónkakáq irarú ehwehne.  
(Mátíyu 17.22-23, Árúka 9.43-45)

30 Sísareq we kéro kereqka mitaq suera Kehrari marakórápéq ákáhpi kíúwe. Kíúwana we kéro ke síwáhnorinieéna mó kegá íné míónsábé írého úwe.

31 We kéro ke síwáhnorú púana áhnte ke míórabeq íre pokúwe. We puké tanahráqsabé síwáhnoréna, Íné wehukení úku aní móintehrara nubiq suaneherawoe. Nubiq suehrana íné pukéna apahtáro wéhékáhtáq oga úkinauge úwe.

32 Úwara sene sirupipeq wene ehweh íre irera kasenáyabe áhreuwe.

Anotah animé insebo i ehwéhne.  
(Mátíyu 18.1-5, Árúka 9.46-48)

33 Segá Kápénéáma suwahpeq kure nahupeq kibekuwe. Sísaga sensabé kasenána, Ahtapeqmé aneq ehwéh sío síoéwaho úwara

34 sega ehiya míówe. Ahtapeq nogútaq mó anínká mó anínkáue, Íné anotah aní ite kiotaqme aní múge iraréra ehwehu puara ehiya míówe.

35 Sísaga tútuue ména airápété téhraníté we kéro keyabé, Ínéba sewíáhro éna anotah aní míanie íwíáhi anínká pehgáriq aní tahnsa míankehe. Wega moke mó ke séhréh aritankéhe

<sup>6</sup> (9.13) Éráisa suraime pabeqme ehwéhne. Mátíyu 17.12-13 tagáhno.

úwe.

36 Séhréh aritankéhe éna káriq aní meqme se ákáhpi iriatena sawiwena sensabé,  
37 Ínénsabe arutaboairaintena mahna tahnsa káriq aní séhréh atéh ánínká íné moq séhréh  
aintéhe. Íné séhréh aintéh ánínká íre peh morá ínébataq séhréhire. Íné eqmaq núwéh aní  
moq séhréh atéhre úwe.

Íre itene naruo aní miéh ánímé itene iyahnabo aní míre ú ehwehne.  
(Árúka 9.49-50)

38 Sóniga Sísansabé, Íwáhnoraníno, mó anínká arenáwírue owainawamarí kaqsúéhraq  
tagéq ahqáho atone. Wega ite íre séiréhnsabé ahqáho atone úwe.

39 Úwana Sísaga wensabé, Íre ahqáho atáhro. Neníwírue irarinsabé ótaq sansá mirai  
anínká abehq éhwéh íre apubúue irare intahráhire.

40 Íre itene naruo aní miéh ánímé itene iyahnabo aní míre.

41 Teiníboq írátíáhro. Ite Manikánka eqmaq núwéh áníné animarí míáhnabé mó anínká ite  
né waní náinaraqmé mi aníné ápeqme íre tabanagia peh ahrreraq kanawire úwe. Manikánka  
mi aníné náwéna apéqmé ahrreraq kanawire úwe.

Ahbabáq sansanká aiq pútare atona sansá saiqnaruhráhi ehwéhne.  
(Mátíyu 18.6-9, Árúka 17.1-2)

42 Sísaga mó mahraréna, Wehukenínká ínénsabe aiq pútare aintéh aní ahbabáq sansa  
áugi ínaraqmé anotahta q íre kawerire. Áugi anínká káriq aní áugi ínaraqmé wene anuopi  
anotah ebáh táhru táhruue púrúrúia káwéhúpépéq tuparuahnana wánípipeq tupekitaq  
tahirímé aiq kaweri irino.

43 Arene ayahnkaraká are ahbabáratana ínaraq mina kirasuo. Are peh morá  
áyáhnkáránkákáq oga mérapeq pokinaraq aiq kawerinae. Are téhtaré áyáhnkáránkákáq  
ahriahri iraipéq kaqauwáhnaraqmé anotah íre kawerinawire.

44 [Mitaq sene sinonka ahriahri ábe soinae. Mitaq íre puinkorahi iráipére.]

45 Arene aigáránká are ahbabáratana ínaraq mina kirasuo. Are peh morá áigáránkákáq  
oga mérapeq pokinaraq aiq kawerinae. Are téhtaré áigáránkákáq ahriahri iraipéq  
kaqauwáhnaraqmé anotah íre kawerinawire.

46 [Mitaq sene sinonka ahriahri ábe soinae. Mitaq íre puinkorahi iráipére.]

47 Arene auranka are ahbabáratana ínaraq mina piruo. Peh morá áúránkákáq Manikánka  
wahnah wahnahnirabeq pokinaraq aiq kawerinae. Téhtaré áúránkákáq ahriahri iraipéq  
kaqauwáhnaraqmé anotah íre kawerinawire.

48 Mitaq sene sinonka ahriahri ábe soinae. Mitaq íre puinkorahi iráipére úwe.(Aisaia 66.24)

49 Sísaga mó mahraréna, Wehukenínká táhutahuqtaq sóreq ahbiorahnanserah Manikánka  
ómi irobinataté ahbioqmarankéhe.

50 Sóreq kaweq nanere. Sóreq auqmah naneq úkínaraqmé itega árahue kaweraránébo?  
Írakaumo. Sóreqka táhutahuq teorahi nanere. Mina inserah itene iyahnabo anímári  
míáhrabeq pehwehrue méq kaweq soréq tahnsanue míáhro úwe.

10

Sísaga wehga wene ahre kaqsueyabe irari ehwéhne.  
(Mátíyu 19.1-12, Árúka 16.18)

1 Sísaga mitaq suena Sorana aroipéq seberaebéq Súría marákórápéq pokúwara áhnte  
wehekéqká weba sáhatíówana wega ahriahri miraúnserahnue síwáhnorúwe.

2 Péhrasi kegá Sísaba séra wega ahbabáq ehweh irarinkeheéra áhwárawe tagéra  
kasenára, Wehga wene ahre suewé mirao sansápo uwana

3 Sísaga sensabé, Mósísine ehwehnka anereiro úwara

4 sega wensabé, Mósísine ehwehnka mahraréna,

Wehga wene ahre kaqsuaníe ínaraqmé pépahqtaq sehiranue móawena  
kaqsuankéhe ire uwe.

5 Uwana Sísaga sensabé, Ite saiyóeq itene irupipeq págege onsabé, Mósísiga mi ehwéh  
sehiranúwe.

6 Wene ehweh íráhro. Wene ehwehnka mahraréna,

Manikánka téh mah marákó márakó mirarotaq wega wehakaq ahreakáq mirarowe.

7 Minayabe wehga wenanoibone nah suena wene ahrreraq moráráq mía míaiagehe ire.

(Stat 1.27, 2.24)

8 Se peh morá ániné áú tahnsa úkigehe. Minayabe se íre mó aní mó aní tahnsa méra peh morá ání tahnsa míagehe.

9 Manikánka wehakaq wene ahreakáq moraráq mía míaotao aritonsabe wehga wene ahre súéhneho úwe.

10 Sísareq we kéro kereqka nahupeq kibekutaq sega mónkakáq ahre sue sansansábé kasenuwe.

11 Kasenuwana wega sensabé, Wehga wene ahre suena mó ahré meyharnaqmé wega ebeq piah ahré ahbabáratena we íre kaweratéhre.

12 Ahrega wenawehq auwena mó anítáq wehkínaraq wega ebeq piah weh ahbabáratena we íre kaweratéhre.

Sísaga, Káriq animárínká ínéba sewiágehboq ahqáho aritého ú ehwehne.  
(Mátíyu 19.13-15, Áruká 18.15-17)

13 Sísaga káriq animárí táhtorankeheéra mó kegá meriqmera mórítówara we kéro kega mórító keyabé suwehgu aritera ahqáho arítówe.

14 Ahqáho arítówana Sísaga mina tagéna abiahnsa aritena sensabé, Mi káriq animárí ínéba sewiágehboq ahqáho aritého. Káriq animárínká ínénsabe aiq pútare aintáh serahno kegá Manikánka wannah wahnahnirabeq awaq miagéhe.

15 Teiníboq írátíáhro. Káriq animárínká Manikánka wannah wahnahnirabeqsabé sirutaboírowe. Peh morá sega onserahno kegá mibeq kioráhowe úwe.

16 Sísaga mi káriq animárí sawiwena wene ayahnkaratáté táhtoqme Manikánsabe, Kawerarite séhréh arito ue púrerúwe.

Áhnte mensáméhnsánkákáq ánínsabé árahue oga mérapeq awaq mianabo i ehwéhne.  
(Mátíyu 19.16-30, Áruká 18.18-30)

17 Sísaga ahtapeq pokinaútaq wehga peheráh séna arehunseraráq ména wensabé kasenéna, Íwáhnoraníno, arewe kaweq aní miahne. Oga mérapeq awaq mianíboq anerininkono úwe.

18 Uwana Sísaga wensabé, Aneqsabé kaweq aníne aintahno? Manikánka webataq kaweqtaq mía míaire.

19 Sehgióro ú ehwehmé aiq ahtebáhne. Mi ehwéhme mahraue kéhre. Mó aní subiq súého. Mó aniné ahre weh abariiyeho. Aebóiyeho. Mó keyabé péhe éhwéh aritého. Péhe éhwéhnuwe mó kené ménsámehnsá meyého. Iteinoibone ehweh ireq se séhréh arítáhro úwe.

20 Uwana wega Sísansabé, Íwáhnoraníno, íné pehgáriq mahbi míarau tanáhráqkákáq amahnágaákáq moke mina kawerue sehgiúge úwe.

21 Úwana Sísaga we tagéna arutaboíratena wensabé, Peh morá náneq íre miraóne. Are pokue moke matiahna mensáméhnsá paiqmaqme móne mewe tabonah ke nário. Mirainaraqmé íopeq kaweq naneqmarí matiankehe.

22 Tabonah ke nárie íné séniro úwana mi anínká irena áhnte mensáméhnsá ko púana wene arupipeq umeh agúwana pokúwe.

23 Sísaga pabeqme we kéro ke tagéna sensabé, Áhnte mensáméhnsá matiáh kegá Manikánka wannah wahnahnirabeq kieyabe anotah pagégéue mirao naneq mire úwe.

24 Úwara we kéro kega mi ehwéhnsabé áhtenuwana Sísaga mó mahraréna, Náníbáqmarino, ménsámehnsánsabe iwíáh iwíáho kegá Manikánka wannah wahnahnirabeq kíransabé anotah pagégéue mirao naneq mire.

25 Kéhma anotah kane. Mi kanká wai abahrabahpipéq kéagínayabé págegeue mirai naneq mire. Mina inserah áhnte mensáméhnsá matiéh ánínká Manikánka wannah wahnahnirabeq kinayabé anotah pagégéue mirai naneq mire úwe.

26 Úwara sega mi ehwéhnsabé anotah ahténéra Sísansabé, Minayabe insega oga mérapeq awaq miahráhiro uwe.

27 Uwana Sísaga se ebitáwéna sensabé, Wehukega íre miraorahowana Manikánka miraorahire. Peh morá Maniká wewega moke miraorahire úwe.

28 Úwana Pítaga wensabé, Itega moke mationa naneq sueq are kérone úwana

29 Sísaga mahraréna, Teiníboq írátíáhro. Ínénsabe sirutaboíréra kaweq ehwéh teriera néne arambehri miraoneheéra sene nahme, sene marakówé súáhmé amahnága Manikánka

áhnte mó 100 mó nárinkéhe. Nárinara sega áhnte nahmé, marakówé matiagehe. Néne arambhiri miraoneheéra sinahnowarehwé siwahwarehwé sensibáqmarimé sensinoibowe sene animárimé súáhmé

30 amahnága áhnte mó kegá sensuwahrah úkigehe. Síbákawaréhwé, sinahnowaréhwé, sinowaréhwé, animárimé áhnte úkigehe. Mah tanáhráq kaweq ehwéhnsábé suwahriáhna kegá se síwíoqnagehe. Mókake oga mérapeq awaq miagéhe.

31 Amahnága áhnte ebeq se kegá mi tanáhráq sinehe kigehe. Sinehe se kegá ebeq kigehe úwe.

Náhmábáh 3 tanáhráq Sísaga, Íné pukéna oga úkinauge ú ehwehne.  
(Mátíyu 20.17-19, Árúka 18.31-34)

32 Sísareq we kéro kereqka ahtapeq méra Sarúsarama suwahpeq kure Sísaga ebeq kúwara sega áhtenuwe. Anehe ku kegá áhreuwe. Sísaga airápété téhraníté we kéro keyabé síáhrabéna sensabé mó kegá we miraoneherau ehwéh mónkakákq teriwe.

33 Teriena, Írátíáhro. Ite Sarúsarama suwahpeq pokonaraq sega íné wehukení úku anímé Manikáne ehweh mibeq mahbeq arítáh kéreq Mósísine ehweh síwáhnoro kereqpa mónuankéhe. Mónuwehrara sega íné, Subiq súáhro aritera nahnso kebá mónuwehrara

34 sega niwiréh aintera tehqni aintera sehikarankákákq árétí sáhtáté nubiq marera nubiq suagéhe. Nubiq súéhraha íné pukéna apahtáro wéhékáhtáq oga úkinauge úwe.

Sémísireq Sónireq anotah aníté úkéyabe suwahbó ehwehne.  
(Matyu 20.20-28)

35 Sémísireq Sónireq Sébérine ahninkáwárarégá Sísaba séra wensabé, Íwáhnoraníno, ite iuwahbéh naneq, itega teawéya naneq, miraúno uye.

36 Uyana wega sensabé, Aneq miraitanínkono úwe.

37 Úwara sega wensabé, Arega wahnah wahnahnónarabeq íópeq miéhnagake ite mó anímé arene ayah púpeq mó anímé arene ayahnaperue tútuue miagehe aito uye.

38 Uyana Sísaga mi abáráhréyábé, Itega tenieya ehwéhnsábé íre iwíáhóye. Íre iwíáhóye éna pabeqme ehwéh mahraréna, Ínéga no kahpúipéqté náneq itega moq nahrahoyo? Mó kegá íné núwéhrarabeq sénirahráhojo úwara sega wensabé,

39 Itega miraorahúye uye.

Uyana Sísaga sensabé, Ínéga no kahpúipéqté náneq itega moq nayehtawoye. Mó kegá íné núwéhanserah ite moq iuwaneherawoe.

40 Peh néne niyah púpeqkakákq niyahnapeqkakákq tútuue miéhra ke omaq sitewé íre néne arambhiri wire. Manikánka omaq sitéh ánítégá mitaq tútuue míayeherawoye úwe.

41 Úwara inayáhnkú we kéro kega mah ehwéh irera Sémísireq Sónireqsabé suwehgu arítówe.

42 Suwehgu arítówara Sísaga moke we kéro keyabé, Ínéba sewíáhro éna sensabé, Mah marákóipéqté sánsámé mó kegá sene ehweh sehigigeheéra wahnah kegá wahnahnarítáhwe. Sene anotah wehwárínká, Itene ehweh ireq sehgióro éra págegeue wahnah arítáhwe. Mi sansá aiq tagaríáhwe.

43 Itewe mi sansá íre oro. Ahqáho. Íné anotah aní míanie íwíáhi anínká wereq miáh ké séhréh aritankéhe.

44 Néne iyahnabone wahnah míanie íwíáhi anínká sene arambhiraq séhréh aritankéhe.

45 Íné wehukení úku anímé mó kegá íné séhréh aintageheéna tutaugo? Írakaumo. Ínéga mó ke séhréh aritanieéna tutaugo. Áhnte ke oga míagehboq se merirena kaweritanieéna pukinie úwe.

Sísaga aura pira áni kawerato ehwehne.  
(Mátíyu 20.29-34, Árúka 18.35-43)

46 Sísareq we kéro kereqka Séríko suwahpeq kuwe. Sega Séríko suwahpeq suaneherautaq áhnte mó kegá kérowe. Aura pira áni wenáwíq Pátíméúsi ahnayehráq tútuue ména ineh inehuwe. We Tíméúsine ahninkáwáe.

47 Wega tútuue ména, Sísá Néhsara suwahpeqte ánínká kouwekire u irena anotahtaq mahraréna, Sísao, Tébitine anahwao, ínensabe arutaboirainto úwe.

48 Úwara áhnte kegá wensabé awehgu atera, Ehiya miáhno uwana wega íre túbáh agia peh anotahtaq mó mahraréna, Tébitine anahwao, ínensabe arutaboirainto úwe.

49 Úwana Sísaga mitaq kowéna, Mahbeq súno teawéro úwara sega aura pira ánínsábé

áhrabéra, Iwíáh íwíáhé irigúno. Arensábé áhrabire uwana  
 50 wene káhq ambántá akairuena apubúue kie irigue Sísaba súwana  
 51 wega wensabé, Aneq mira atanínkono úwana aura pira ánínká wensabé, Íwáhnoraníno,  
 íné taganiboq néne niura kawerainto úwana  
 52 Sísaga wensabé, Pehwehrie pokéwahno. Ínénsabe aiq pútare aintahnaga aiq  
 kaweratóge úwana wene aura apubúue kaweragúwana ahtapeq Sísá kérowe.

11

Sísaga Sarúsarama suwahpeq kú ehwehne.  
 (Mátíyu 21.1-11, Árúka 19.28-40, Sóni 12.12-19)

1 Sísareq we kéro kereqka Sarúsarama suwahpeq wahtotaq kíútaq sega Óríwi sawéhrápéq  
 kíúwe. Mi sawéhwé Páitápási suwahpeq Pétáni suwahpeq wahtotaq kéhre. Mi sawéhrápéq  
 kíútaq Sísaga we kéroya aníte eqmaq suanaútaq  
 2 sensabé, Isebeq wahtotaq ke suwahpeq pokotao. Mitaq kirataq iyaráh ká tónki áráh  
 wehuke íre áhkókóue nogí ká tagéta pugeqme meqme setao.  
 3 Pugeréhataq mó anínká itensabé, Aneqsabé pugerehyo ínaraq wensabé, Itene Wahnah  
 áhkókóue kinkeheéta meroye. Wega mótaq tónki eqmarahnana kéna sinkehe teawétao  
 éna eqmaq suowe.

4 Eqmaq suowara pokue anotah ahtápéq onsa kéhrabeq iyaro tonkí áráhq tagéra  
 pugeróye.  
 5 Pugeróyataq mitaq iriwe míó kega sensabé, Aneroyo? Tónkiwe aneqsabé pugerehyo  
 uwara  
 6 sega Sísaga teriu ehweh teríuyara sega sensabé, Meyáhtao uwe.  
 7 Meyáhtao uwara tónki áráhq Sísaba seweqmera sene korósi mi kané abobiahtaq uwiq  
 máróyana Sísaga mi tonkíné abobiahtaq kierútu agúwe.  
 8 Áhnte kegá Sísansabé iwíáh iwíáh ató púara sene korósi ahtapeq uwiqme abaeue  
 móarówara mó kegá uworapeqté áwánká ánáhakaq áyáhnáwé apiwe ahtaapeq  
 awahrirarówe.  
 9 Sísareq moráráq ebeq ku kereq anehe ku kereqka anotahtaq mahraréra, Itene Wahnah  
 áwírue si anínsábé iwíáh iwíáh atone.  
 10 Tébiti iteriboga naho wahnah wahnahnúnserah kawerue wahnah wahnahnína anínsábé  
 iwíáh iwíáh atone. Maniká íópeq míéhraq wensabé iwíáh iwíáh atone uwe.

11 Sísaga Sarúsarama suwahpeq kiena Manikánsabe iwíáh iwíáh atáh náhúpéq kibekéna  
 mitaq moke ko naneq aurankaué tagówe. Penkinaúnsabe wereq we kéro kereq airápété  
 téhranítégá mitaq suera Pétáni suwahpeq pokuwe.

Sísaga awankánsabe sera íre iyankéhe ú ehwehne.  
 (Mátíyu 21.18-19)

12 Ahbiah tahnsá sega Pétáni suwahpeq suera ahtapeq sutaq Sísá arupibiúwe.  
 13 Arupibiúwana ánáhakaq áwánká móbeq tagéna awankánara sabátáhq koragówana íre  
 serankakáq peh ánáh kowe. Sera íre iyo tanahráq púana sera írakaunúwe.  
 14 Írakaunúwana Sísaga mi awánkánsábé ehweh teawena, Mókake sera íre íyéhna puara  
 mó kegá arene sera íre íséwe naneherawoe úwara we kéro kega wene ehweh írówe.

Sísaga Manikánsabe iwíáh iwíáh atáh náhtápéqté wíráipéq paiqnanánu ke máhpeq kaqsuo  
 ehwéhne.  
 (Mátíyu 21.12-17, Árúka 19.45-48, Sóni 2.13-22)

15 Sísareq we kéro kereqka Sarúsarama suwahpeq kíútaq Sísaga Manikánsabe iwíáh iwíáh  
 atáh náhtápéqté wíráipéq kibekéna mitaq paiqnanánu ke máhpeq kaqsuowe. Kaqsuena  
 móne paiqnanánu kené wéhuwehu tahbéwári pioruena kiboki paiqnanánu kené síahwarí  
 pioruena paetárara aruowe.  
 16 Paetárúena sensabé, Manikánsabe iwíáh iwíáh atáh náhtápéqté wíráipéqmé itene  
 ménsámehnsá íre mewe nógóro aritowe.  
 17 Íre mewe nógóro aritena síwáhnoréna, Manikáne ehwehnka mahraréna,  
 Néne nahme mah kehiná kéhínánká púreré nahne áwíratagéhe ire. (Aisaia 56.7)  
 Itega miraonka mah nahmé aebó kégá mehwatíáhnserah nah úkire úwe.

18 Úwara ómi mitaq sáhurió kega Sísane ehwehnsabé áhtenu puara Manikáne ehweh mibeq mahbeq arítáh kéreq Mósísine ehweh síwáhnoro kereqka tagéra Sísansabé áhreéra, We árahue subiq suanéhnkono éra sío síouwe.

19 Íó tupekútaq Sísareq we kéro kereqka Sarúsarama suwahpeq suera pokuwe.

Púrerínaraq aiq pútaq náninawire íwíahi anínká meyankéhe ú ehwehne.  
(Mátíyu 21.20-22)

20 Ahbiahipeq sega Sarúsarama suwahpeq kouwekoneherautaq ehyatagú awanká tagowana aiq moke ehyatagúwe.

21 Ehyatagúwana Sísaga mi awánká teawu ehwéhmé Pítaga ahreraq matawéna Sísansabé, Íwáhnoraníno, tagáhnno. Inokáh arega ehweh teawátóna awánká aiq ehyatagire úwana 22Sísaga sensabé, Manikánsabe aiq pútare atáhnro.

23 Teiníboq írátíáhnro. Wehukénká sáwéhyabe teawena, Sáwého, arega mitaq sue anotah kawéhúpipéq kogahno teawinaraqmé mirainawire. Wega teawina ehwehnsabé árahinabomo íwíáh íre ínaraq peh ínégá iraru ehwéh aiq pútaraginawire íwíáh ínaraqmé mirainawire.

24 Teiníboq írátíáhnro. Ite púrerirataq aiq pútaq náninawire íwíahirataq náninawire úwe.

25 Sísaga mó mahraréna, Are iriwe púrerina tanáhráq mó anínsabé abiahnsa atéhnaraq wene ahbabáqsabe íre iwíáhue ahreraq matiahno.

26 [Íópipeq míéh Ítéríbógá arene ahbabáqsabe íre iwíáhinkeheé abiahnsa atéh ániné ahbabáqsabe íre iwíáhue ahreraq matiahno úwe.]

Sísansabé, Insega miraúno atáráiro u ehwéhne.  
(Mátíyu 21.23-27, Áruká 20.1-8)

27 Segá Sarúsarama suwahpeq mó sure Sísaga Manikánsabe iwíáh iwíáh atáh náhtápéqté wírípéq nogutaq Manikáne ehweh mibeq mahbeq arítáh kéreq Mósísine ehweh síwáhnoro kereq Asiu kené abowah wehreqka weba séra

28 kasenéra, Arega miraóna naneqme árahinie miraono? Insega miraúno atéhnsabé miraono? Teio uwe.

29 Teio uwana Sísaga sensabé, Ínéga itensabé moq kaseninie. Kasenona ehweh tenírataqmé ínénsabe miraúno aintárái aní teinie.

30 Teinie éna Sóniga wání meri merininkeheéna insega eqmaq áuwátáiro? Manikánka eqmaq áuwátáiro? Peh wehukega eqmaq áuwátóo? Teniéro úwe.

31 Teniéro éna, Tenírataqmé ínénsabe miraúno aintárái aní teinie úwara sega epéq sío síoéra, Anere teawenéhknono? Manikánka eqmaq áuwátáire teawénaraqmé wega itensabé, Aneqsabé wene ehwehnsabé íre aiq pútare atáro inae.

32 Ite wehukega Sóni eqmaq áuwátówe moq íre teaweráhúne uwe. Ómi mó kegá, Sóni aiq pútaq Manikáne ehweh irari aní míre íwíáhunsabé sega mi keyábé áhreu puara

33 Sísansabé, Sóniwe insega eqmaq áuwátáiramo. Ite íre tagarione uwana Sísaga sensabé, Itega íné íre teniéwe. Minayabe ínégá moq ínénsabe miraúno aintárái aní íre teinie úwe.

12

Sotáq wahnahnuro ahbabáq keyábé pabeqme ehwéhne.  
(Mátíyu 21.33-46, Áruká 20.9-19)

1 Sísaga Asiu keyábé pabeqme ehwéh mahraréna, Wehga sonsoqme náhniáq sera ayu uqmarena wirarena wahnahnína uqná peataire. Pearena náhniáq sera ano kunubaipeq sarerankeheéna mata ubuqmarena mó keyábé, Néne sotáq wahnahnue náwe soqintewáhnro aritena mitaq suena íre wahto wáhnaupeqté ké suwahpeq pokuraire.

2 Náhniáq sera irai tanáhráq ákáhtaq koweankeheéna wene arambehri aní sotáq wahnahnuro kebá eqmataire.

3 Eqmatairara sotáq wahnahnuro kegá we táhtoqme sera íre náwasa subiqmarera kaqsúówe.

4 Kaqsúówana so aboga mó arámbéhrí aní seba eqmatairara sega wene ayahqnotaq subiq marera íre kaweq sansá atárówe.

5 Íre kaweq sansá atárovana so aboga mó aní eqmatairara sega we subiq sutowana mó wene arambehri ke eqmaq sutairara sega mó tahmáro subiqme kaqsuera mó tahmáro subiq sutowe.

6 Subiq sutowana peh morá mó aní míaraire. Mi wehné arunáwí áhnínkáwá míarairana wega iwíáhéna, Nénahni púara sega wensabé áhtenéra wene ehweh iragéhe éna anehe wenahni eqmataire.

7 Eqmatairara wahto kuraitaq sotáq wahnahnuro kegá we tagéra seye náhenéra, So abone ahnínkáwá aiq sire. Mah so awaq mianéhboq we subiq suanéhe iwíáhéra

8 we táhtoqme sopípeq subiq suera wene anonka máhpeq tuparutowe.

9 Wenahni subiq sutonsabé so aboga mi ke anere aritankéhbo? Teiníboq írátíáhro. So aboga wene sotápéq séna wahnahnuro ke subiq suanawire. Subiq suena wene so mó ke kawerue wahnahnigeheéna eqsitankéhe.

10 Eqsitankéhe éna, Minayabe Manikáne ehwehnka íné éhweh mahraréna,  
Nah píáh kégá suto wahqká moke nahwiahnsanse kiotaikire.<sup>7</sup>

11 Itene Wahnahnka mirainsabé itega, Kaweq sansáne iwíáhuéne ire. (Buk Song 118.22-23)

Itewe mi sehirá íre ahtebaho úwe.

12 Úwara wene ehweh irera seye náhenéra, Sísaga mah pabéqmé éhwéhnué itepi parobehre iwíáhuwe. Mira iwíáhu puara sío síoéra, We táhtoqme karábúsiipéq móatanéhe éra peh mitaq sáhurió keyabé áhreunsabe mó iwíáhéra Sísá auwera pokuwe.

Sega Sísansabé, Táhkísi moné awenéhknono kasenu ehwéhne.  
(Mátíyu 22.15-22, Áruká 20.20-26)

13 Asiu wahnah kegá táhmaro Péhrasi kereq táhmaro Érótime iyahnaboreqsabé, Sísaga áhwára áhwára ehwéh irarinkehboq áhwárawe tagéq pokue págegeue kogaseno éra eqmaq súówe.

14 Eqmaq súówara kure Sísansabé, Íwáhnoraníno, ite tagarionawe arewe aiq pútaq ehwéh iraréna aní móne. Arega anotah kereq pehgáriq kereqsabé peh monseráh iwíáhóne. Arega wehuke íre ehnenia peh Manikáne sansá tábúsoqme pahsuqme íwáhnoróne. Minayabe teio. Aneq iwíáhono? Itega Aroma kené wahnahme Sísáhri táhkísi moné awenéhknono? Árahonehnkono uwe.

15 Árahonehnkono uwana Sísaga sene epéráhpéru iwíáh tagéna sensabé, Aneqsabé íné áhwárawe tagéq níwioqnaho? Ebah moné taganiboq mewera séro úwara

16 sega peh morá ébáh móné ábóraq márówe. Ábóraq márówana wega sensabé, Mah monéraq insene píkísahakáq áwíqkakaq kehro úwara sega wensabé, Aroma kené wahnah aní Sísáhrine uwe.

17 Uwana wega sensabé, Aroma kené wahnahne náneq wewe nówéro. Manikáne naneq wewe Maniká nówéro úwara sega wene ehwehnsabé áhtenuwe.

Manikánka pukia ké iriwe oganúq sitankéhe ú ehwehne.  
(Mátíyu 22.23-33, Áruká 20.27-40)

18 Sáyúsi kewé pusa ké íre iriwe oganúq sitankéhe iwíáhu kee. Táhmaro mi kegá Sísaba séra wensabé,

19 Íwáhnoraníno, Mósísine sehiranka maharéna,

Íre aninkákáq wéh pukínaraq wenábáqka kéweiní meyankehe. Mi inínká maqmarahna animári wenawahne animári míageheéna meyankehe ire.

(Lo 25.5)

20 Minayabe abapete téhraníte se ábárahnahnah míarowe. Siwahwágá ahre mewena íre aninkákáq uraitaq pukuraire.

21 Pukurairana náhmbáh 2 abaqkávágá awahwáné kéweiní mewena íre aninkákáq uraitaq pukurairana náhmbáh 3 abaqkávágá moq monseráhnuraire. Moke mi abárahnahnahna mi iní mótaq mótarue mewera íre aninkákáq urotaq orah animári pukurowe.

22 Moke mi abápéqté téhraníte se ábárahnahnah mótaq mótarue mi kewíní mewera íre aninkákáq urotaq orah animárinká pukurowana sinehemé mi iní moq pukuraire.

<sup>7</sup> (12.10) Aigárápéqté éhwéh Mátíyu 21.42 tagáhno.

23 Moke mi abáráhnáhnka mi iní meronsabé iriwe oganúq sitahnaraq insene ahre míanabo kasenuwe.

24 Kasenuwana Sísaga sensabé, Itewe Manikáne púkuipéqté séhíránkákáq wega págegeue miraorahi sansánkákáq íre ahtebah puaq áhwára áhwára ahbabáq iwiáhowe.

25 Manikánka pusa ké iriwe oganúq sitahnaraq se peh íópeqté ké tahnsa mía míaigehe. Mi tanáhráq wehga ahre íre meyangéhe. Ahrega íre wehkigehe.

26 Pusa ké oganúq sitahnayabé Mósísiga sehgióro ú sehira íre sáhnshoo? Uworapeqté káriq awanká irarehnsabé sehiramé Manikánka Mósísinsabé mahraréna,  
Íné Ébárahmane Maniká múge. Íné Áhísáhkine Maniká múge. Íné Sékópane  
Maniká múge úwe. (Kisim Bek 3.2,6)

27 Manikámé íre pusa kéné Manikáne. Írakaumo. We peh oga míáh kéné Maniká míre. Minayabe itega íre tábúsoqme iwiáhowe úwe.

Manikáne kiotaiki sansánsabé éhwéhne.  
(Mátíyu 22.34-40, Áruká 10.25-28)

28 Mósísiga sehgióro ú ehweh síwáhnori aní mitaq súwara Péhrasi kegá ehwehuwana irowe. Sísaga Sáyúsi kené kase ehwehnsabé tábúsoqme teriu púana wega Sísansabé kasenéna, Sehgióro ú ehwehmé aneq ehwéhniká mó ehwéh kiotaikiro úwe.

29 Úwana Sísaga wensabé, Kiotaiki ehwéh teaweníboq iro.  
Ísara keo, írátíáhro.  
Maniká itene Wahnah peh morá aní míéhre.

30 Maniká itene Wahnahnsabé irutaboioro.

Moke itene irupipeqkákáq  
moke iteiwankakáq  
moke itene iwíáhopipéqkákáq  
moke itene págege inónkánkákáq  
Manikánsabe irutaboioro.

Mah ehwéhme mó sehgióro ú ehweh aiq kiotaikire.

31 Mó kiotaiki ehwéh iro.  
Arerensabé arutaboírónanserah  
mó anínsabé moq arutaboírúno. (Lo 6.4-5, Wok Pris 19.18)

Mó sehgióro ú ehwehniká mah ehwéhtaré íre kiotaikire úwe.

32 Úwana síwáhnori anínká Sísansabé, Íwáhnoraníno, arega aiq tábúsoqme iraréne. Manikámé peh morá aníne. Peh morá webatare. Arega aiq pútaróne.

33 Itega Manikánsabe moke itene irupipeqmé, moke itene iwíáhipeqmé, moke itene págege inónkámé irutaboírúnawe, anotah kawéq sánsáne. Iteitensabé irutaboírúnanserah mó anínsabé moq irutaboírúnawe anotah kawéq sánsáne. Wehukega ménkámehniká subiqme agewe Manikánsabe titiruruqaruowe. Arutaboíré sansanká moke titiré sansa kiotaikire úwe.

34 Úwana Sísaga we ahtebah ehwéh irena wensabé, Manikánka wahnah wahnahnirabeq arewe wahtotaq míahne úwara míó ke síáhtónsabe mó ehwéh íre kasenuwe.

Manikánka omaq ato aní éhweh Sísaga kasenu ehwehne.  
(Mátíyu 22.41-46, Áruká 20.41-44)

35 Sísaga Manikánsabe iwíáh iwíáh atáh náhtápéqté wíráipéq síwáhnoréna míó keyabé, Mósísine ehweh síwáhnoro kegá, Manikánka omaq ato aní koweriréh anímé we peh Tébitine anahwa wíre ewe. Mi ehwéhme aneqsabé irareo kasenéna

36 Manikáne Awanka Tébiti iwíáh atowana igonkó pukúipéq sehiranúwana mi ehwéhniká mahraréna,  
Maniká itene Wahnahnka néne Wahnahnsabé,  
Niyah púpeq tútuue míéhnaq  
arene naruo saiqnariankehe atóge úwe ire. (Buk Song 110.1)

37 Tébitiga mi anínsabé, Néne Wahnahne ato puana we árahue wene anahwa míanabo kasenuwe.

Péhrasi kereq Mósísine ehweh síwáhnoro kereqka ahbabárowe ú ehwehne.  
(Mátíyu 23.1-36, Árúka 11.37-54, 20.45-47)

Kasenúwara áhnte wehukégá wene ehweh irera anotahtaq iwíáh iwíáhowe.

38 Sísaga síwáhnorútaq mahraréna, Mósísine ehweh síwáhnoro kegá mira onserahniyeho. Mó kegá se tagéra sensíwíq pankerageheéra íre wahto korósí úbíqmera nogówe. Sega máhkétirapéq nogótáq mó kegá se mehweh ariteyabe suwahbehre.

39 Momiwí nahtápéq pokotaq peh kaweqtapéq tútuue méyabe suwahbehre.

Táhutahurabeq aboawah wehwáí tútuue míahrabeq méyabe suwahbehre.

40 Sega kéweinínsónsábé péhe éhwéh teriera sene ménsámehnsánkakaq sene nahnkakaq mewe meweowe. Mó kegá ite kaweqtaq míáh ké wóe igeheéq wehuke míáhtáq íre wahtotaq púreq aruqarurowe. Mirao puana Manikánka ehweh aritahna tanáhráq se anotahtaq kamah arinkéhe úwe.

Tabonah inínká Maniká náwu monéyábé éhwéhne.  
(Árúka 21.1-4)

41 Wehukega Maniká móne náuwrabeq Sísaga wahtotaq tútuue míowara áhnte kegá séra sene móne mitaq náuwana tagówe. Tagówara áhnte monéákáq kegá áhnte moné náuuwe.

42 Náuwana tabonah kewéinínká séna káriq monéraré náuuwe. Mi monéraré peh morá ákáhtaq pabusa móné tahnsane.

43 Sísaga we kéro keyabé, Ínéba sewíáhiro éna teiníboq írátíáhiro. Mah tabónáh kewéinínká náwí mónégá moke mó kegá náwé móné kiotaikire.

44 Sega sene pehipi matíáh móné náuwana mah tabónáh kewéinínká moke wene matíéh mónéwé aiq náwíre. Aiq náwí púana amahnága táhutahuq paiqmarahna moné íre kéhre. Minayabe wega náwí mónégá moke mó kegá náwé móné kiotaikire úwe.

13

Sísaga, Manikánsabe iwíáh iwíáh atáh náh íre kaweraginawire ú ehwehne.  
(Mátíyu 24.1-2, Árúka 21.5-6)

1 Sísaga Manikánsabe iwíáh iwíáh atáh náhtáqté wíráípéqté tueyokútaq we kéro anínká wensabé, Íwáhnoraníno, tagáhno. Nah kéh ébáhmé áhnte kaweq ebáhne. Áhnte kaweq ebáh náhmáí tagáhno úwe.

2 Úwana Sísaga wensabé, Amahnága mi anótáh náhmáí aiq tagahno? Mi peréhnéhnia ébáhmáí miraué íre moráráq kagainae. Peh moke paentárara aruaneherawoe úwe.

Sísaga anehe tanáhráq íre kaweq sunúq sínawire ú ehwehne.  
(Mátíyu 24.3-14, Árúka 21.7-19)

3 Manikánsabe iwíáh iwíáh atáh náh korabeq seberiopéq Óríwi sawéhrápéq Sísaga tútuue míowara Pítareh Sémísireh Sónireh Ehntarurehga weba séra kasenuwe.

4 Kasenára, Arega métáq irarénawe ahkake miraoneherabo? Miraonehera irataq aneq ábóraraginabo uwe.

5 Uwana Sísaga wensabé, Mi tanáhráqsábé mó kené péhe éhwéhnsábé aiq pútare aritéhboq auráq matawéq tagaríáhiro.

6 Áhnte kegá mótaq mótarue néníwírué séra, Ínéwé Manikánka eqmaq núwéh ání múge irarirataq áhnte kegá sene péhe éhwéhnsábé aiq pútare aritagéhe.

7 Mi tanáhráq ebehowe ira ehwéh ireq mó ebehowe sóiriq ehwéh íréhrataqmé íre áhreoro. Téhwé teiú náneq ebeq sínana anehe tanáhráq íre apubúue sinae.

8 Mó kehinánseq mó kehinánseqka ebehoneherawoe. Mó wahnáhné awahrahreq mó wahnáhné awahrahreue ebehoneherawoe. Mitaq mahtaq máriinae. Ehwehranae. Minawarínká uwo uwoira tanáhráq áhwáranáe úwe.

9 Sísaga mó mahraréna, Kawerue auráq matíáhiro. Sega ite kaunsíri ke kotiorarabeq móitera sene momiwí nahtápéq áréti sahtaté iubigéhe. Néne sánsá sehgiónsábé ákáhtaq wahnáh kéreq anotah wahnáh kéreqka ehweh aitageheéra seba móitagéhe. Mi tanáhráq néne ehweh terigéhe.

10 Téhwé kaweq ehwéh moke mah kehíná kehíná teri terinigehe.

11 Sega ehweh aitageheéra táhtoqme meiqmera móúwéhrrataq itega irarira ehwéhnsábé iwíáh kikiriyeho. Írakaumo. Mi tanáhráq Manikáne Awanka iwíáh aitahna ehwéh irarero. Mi tanáhráq íre iteitene ehweh irarigehe. Manikáne Awanka iwíáh aitahna ehwéh irarigehe.  
 12 Subiq suageheéra siwahwárehga síbákawaréh móruehrara síbákawaréhga siwahwáreh móruegáhe. Subiq súáhro aritagéhe. Sibowárehga monseráhnue sene animárí móruegáhe. Animárinká sinoibonsabé abiahnsa aritera subiq súáhro aritagéhe.  
 13 Néne sánsá sehgió púara ómi kegá itensabé íre suwahbanae. Néne sánsá íre susa anehe tanáhráqkákáq peh kawerue sehgirataq Manikánka ite meirena oga mérapeq móitankéhe úwe.

Sísaga íre kaweq sunúq sínaraqsábé teriu ehwéhne.  
 (Mátíyu 24.15-28, Árúka 21.20-24)

14 Sísaga mó mahraréna, Íre kaweq ahabábárorahi naneq Manikánsabe iwíáh iwíáh atáhrabeq maragéhe. Mitaq órira kahna tagagehe. Mah sehirá tagah keo, iwíáhue tagahro. Mi tanáhráq Súría marakórápéq miéhrrataq sáwéhrrapeq pehbeheráh pokoro.  
 15 Mi tanáhráq máhpeq miéhrrataq itene ménsámehnsá kiweyaneheéq nahupeq kibekiyehboq pehbeheráh pokoro.  
 16 Sotápéq miéhrrataq itene korósi koweyaneheéq itene nahtapeq kouwekiyehboq pehbeheráh pokoro.  
 17 Mi tanáhráq kía miéhra inínsónseq inahunah inínsónseqka íre pehbeheráh pokorahi puaq sensabé irutaboioro.  
 18 Ah áhnte kariéhínagake mi iré káwéq sunúq sínehboq púreroro.  
 19 Mitaqqake anotah íre kaweq sunúq sinawire. Manikánka mah marákó marákó mirarotaqqakákáq amahnágaákáq mina tahnsa sunúq íre kéhre. Mókake mó mina tahnsa sunúq íre sinae.  
 20 Íre sinae éna, Manikánka aiq iwíáhéna, Íné túbáh agonaraq mi sunúqká ómi mah kehiná kéhiná subiq suahráhire. Ómi subipáhraruehneho éna mi tanáhráq wahtonaranie iwíáhúwe. Mira iwíáhúnsabe wega omaq sitéh keyábé arutaboiri puana mi tanáhráq wahtonaruankéhe úwe.

21 Sísaga mó mahraréna, Mi tanáhráq mó kegá itensabé, Tagahro. Ite meirena kaweraintankeheéna Manikánka omaq ato animé mahtaq miéhre irara mó kegá itensabé, We isebeq miéhre igehe. Sene péhe éhwéhnsábé aiq pútare aritého.  
 22 Íné Manikánka omaq intárai aní múge irarira kereq íné Manikáne ehweh iraru aní múge irarira kereq péhepehe ehwéhne seneherawoe. Sega sirataq ótaq sansánkákáq anotah pagégé sánsánkákáq miraigehe. Áhnte kegá sene ótaq sansá tagéra sensabé aiq pútare aritageheéra mi sansá miraigehe. Manikánka omaq sitéh kéga moq sene péhe éhwéhnsábé aiq pútare aritageheéra miraigehe.  
 23 Moke teiú náneq mókake ábóraragína puaq auráq matawéq tagariáhro úwe.

Anehe íné wehukení úku anínká tuinauge ú ehwehne.  
 (Mátíyu 24.29-31, Árúka 21.25-28)

24 Sísaga mó mahraréna, Mitaqqake íre kaweq sunúq sótaikínaraq pópoqnah íre patahinae. Inokáhpeq íre íónitanae.  
 25 Wehyoqmarí íópeqté meginae. Íópeqté págege naneqmarí moke kúrugúruinae.  
 (Aisaia 13.10, 34.4)

26 Mi tanáhráq íné wehukení úku anínká piribirioyahnkakaq téhreh naneqqakákáq págegeue tuonara tagagehe.  
 27 Túónagake pembíahnka anotah ehwéhínaraq Manikánka wene íópeqté ké eqmaq suankéhe. Eqmaq suena wega omaq sitéh keyábé, Moke mah marákó marákórápéqté mitaqté kéweriqme mahtaqté kéweriqme ue ue meriqme sero inkehe úwe.

Sísane ehweh íre parabagia peh ahriahri kagainawire i ehwéhne.  
 (Mátíyu 24.32-35, Árúka 21.29-33)

28 Sísaga mó mahraréna, Awankánsabe iwíáhue tagéq iahtebahro. Awanká ayahnawe anonkakaq kahna anáh aunínaraq itega iwíáhéq, Ópeq áhníbórá sire aiq ahtebóne ewe.  
 29 Mina onserah moke teiú náneq ábóraragínaq tagéq íné túóna tanáhráq aiq wahtotarire igehe.  
 30 Teiníboq írátíáhro. Amahnága oga míáh kéga ómi pehipi íre pukigehe. Ebeqme moke

teíú náneq ábóraragínaq tagéq anehe pukigehe.

31 Íópeqkákák mah marákó márakóákák parabagínana ínégá teíú éhwéhmé íre parabagia peh ahriahri kagainawire.

Sísa tuina tanáhráqmé ómiga íre iahtebóna ehwéhne.  
(Mátíyu 24.36-44)

32 Sísa mó mahraréna, Íné túóna wehekáhnkákák áhwahakák ómiga íre ahtebahwe. Íópeqté kégá íre ahtebahwe. Íné Manikáne ahninkáwágá moq íre ahteboge. Peh morá Maniká Iteriboga webataq mi wehekáh tagaríéhre.

33 Túóna tanáhráq ite íre tagaríáh púaq níwénunéq kawerue auráq matíáhro.

34 Íné túónaraqmé wehga íre wahto ah nóginserahne. Wegá wene nahtapeq suena pokinaitaq wene arambehri ke wahnah arámbéhrírák sítéhre. Mó aní mó arámbéhrírák mó aní mó arámbéhrírárue sítéhre. Ahnansahraq wahnah atéh ánínsábé, Kawerue auráq matiahno éna pokire.

35 Mína inserah íné anotah Wahnáh túóna tanáhráq íre tagaríáh púaq kawerue auráq matíáhro. Íó tupekínaraqpópoq inokáhnabubupopoq kokórega téh ehwehnínaraqpópoq ahbiahipeqpópoq tuinauge.

36 Apubúue túónaraq ite sugéhboq peh kawerue auráq matíáhro.

37 Itensabé teíú éhwéh ómi mah kehiná kéhíná teríúge. Níwénunéq kawerue auráq matíáhro úwe.

14

Wahnah kegá Sísa subiq suaneheéra moraénu ehwéhne.  
(Mátíyu 26.1-5, Árúka 22.1-2, Sóni 11.45-53)

1 Ahrina tahnsá sótaikú iahrreraq ko tanahráq íre múi párétí né tanahráq wahtonútaq Manikáne ehweh mibeq mahbeq arítáh kéreq Mósísine ehweh síwáhnoro kereqka sío síóera, Sísave árahue epéq táhtoqme mósubiq suanéhnkono íwíáhuwe.

2 Mira íwíáhéra, Áhnte wehekéqká táhutahurirataq ehwehéra tobehiehboq Sísa pehraganehe uwe.

Peh morá ínínká Sísa ayahnopeq wéri abaq ato ehwehne.  
(Mátíyu 26.6-13, Sóni 12.1-8)

3 Pétáni suwahpeqte áni Sáímóniwe anotah nao wagú anine. Minayabe mó kegá, Náonkakaq Sáímónie ue wéhuwehu áwíratówe. Sísa Pétáni suwahpeq ména mi aniné nahtapeq táhutahurúwana peh morá ínínká áhnte moné tahnsa wéri antéhyá mewe súwe. Mewe séna mi antéhyá piteruqme Sísa ayahnopeq wéri antiatowe.

4 Antiatowara táhmaro míó kega abiahsanéra seye náhenéra, Mi weríwé aneqsabé pehipi antiatehro?

5 Íre pehipi antiatehtáq tahirimé mi werí paiqmarena 300 moné mewena mi moné tabonah ke nári irino éra mi ínínsábé awehgu atówe.

6 Awehgu atówana Sísa sensabé, Mi iní pehragatáhro. Aneqsabé awehgu ataho? Wegá mira aintéh sánsámé kaweq sansáne.

7 Tabonah kewe ahriahri iteba mía míaowaq ite iuwahbáhnagake séhréh aritahráhowe. Ínéwé ahriahri iteba íre mía míainie.

8 Mi ínínká aiq miraorahi sansá aiq miraire. Íné maisarageheéna mi ínínká ninonka abaq intéhre.

9 Teiníboq írátíáhro. Mah marákó márakó kaweq ehwéh teri terinirataq wega amahnága mirai naneq ehwehnkákák terigéhe. Terírataq íréhra kegá wéri abaq intéh ínínsábé iwíáhigehe úwe.

Súrásaga wahnah keyábé, Ite meiqmena Sísa móitanie ú ehwehne.  
(Mátíyu 26.14-16, Árúka 22.3-6)

10 Sísa kéro ke airápété téhranité míówe. Sebaté áni wenáwíqtare Súrása Ísíkaríótie. Wegá Manikáne ehweh mibeq mahbeq arítáh kébá pokue sensabé, Sísa iteba méauwanie úwe.

11 Méauwanie teriuwara iwíáh iwíáhéra móne awenéhboq miraúno uwana Súrásaga kowe

aritená se Sísaba móríte tanáhráqsábé iwíáhue kabaráwe.

Sísareq we kéro kereqka moráráq táhutahuru ehwéhne.  
(Mátíyu 26.17-25, Árúka 22.7-14, 21-23, Sóni 13.21-30)

12 Íre múi páréti né tanahráq ebeqte wéhékáh sótaikú iahreraq ko tanahráq sútaq Asiu kegá sipisípiq áráhq subiqme titiru tanahráq súwe. Mi tanáhráq we kéro kega Sísaba séra wensabé, Sótaikú tanahráq iahreraq kéh táhútáhúq nankehboq eheq kogaweratanéhnkono ue kasenuwe.

13 Kasenuwana Sísaga we kéroya aníte eqmaq suanaútaq sensabé, Wahtotaq kehiná suwahpeq pokotao. Obenkisa wání ántéhiyánkákákq ánínseq piehgírataq kérahtao.

14 We kibekína nahtápéqté ábówánsábé mahraréta, Íwáhnori anínká mahraréna, Ínéreq íné séniráh kereqka sótaikú tanahráq iahreraq kéh táhútáhúq nanehboq mi paqnáhípeq teio ire teawetao.

15 Teawírataqmé wega ménsámehnsá aiq kaweria páqnáhípeq teinkéhe. Mitaq itene táhutahuq kaweraráhtao éna eqmaq suowe.

16 Eqmaq suowara mi anitégá mi ke suwahpeq pokue Sísaga teriunserah tagéra mitaq sótaikú tanahráq iahreraq ko tahutáhúq kaweraróye.

17 Ío tupekútaq Sísareq airápété téhraníte we kéro kereqka mitaq séra 18tútuue táhutahurutaq Sísaga sensabé, Teiníboq írátíáhro. Ite míáhrabeqte áni ínéreq moráráq nóya anínká néne naruo kowerirankéhe úwe.

19 Úwara sene sirupipeq umeh agúwara morá áni morá ánínkáue Sísansabé, Arega ínénsabe irareno ue kasenuwe.

20 Kasenuwana Sísaga sensabé, Airápété téhraníte omaq sitórabeqte ánínká ínéreq morá párétáhípeq páréti pámbáhúya animé we wire.

21 Manikáne ehwehnka aiq irarinserah íné wehukení úku aní pukinie. Néne naruo kowerirahna aní anotahtaq kamah awinawire. Wenanoga we íre maqmiotaq tahirímé aiq kaweri irino úwe.

Sísaga párétiakákq sera ano ko kahpúákákq náriu ehwéhne.  
(Mátíyu 26.26-30, Árúka 22.15-20, 1 Kórína 11.23-25)

22 Sega táhutahurutaq Sísaga páréti mewena Manikánsabe kaweróne atena keqme náriena sensabé, Mahnawé niwaq mire. Náhro úwara nowe.

23 Nowana wega náhniákq sera ano kahpú mewena Manikánsabe kaweróne atena náriuwara ómiga nowe.

24 Sísaga sensabé, Mahnawé néne korahq mire. Néne korahq tuinaga itereq áhnte mó kereq Manikánka insahwé aitena itene ahbabákq kaweraitankéhe.

25 Teiníboq írátíáhro. Náhniákq sera ano mahtaq mó íre nanie. Mókake Manikánka wahnah wahnahnínarabeq míáhnaraq o sera ano nanie úwe.

26 Sega Manikánsabe iwíáh íwíáh igonkónéra máhpeq tueyokéra Óríwi sawéhrápéq pokuwe.

Sísaga Pítansabé, Íné nuwaniewóne ú ehwehne.  
(Mátíyu 26.31-35, Árúka 22.31-34, Sóni 13.36-38)

27 Sísaga sensabé, Manikáne ehwehnka mahraréna,  
Ínéga sipisípiq Wahnáh subiq súáhnaraqmé moke sipisípiqmarínká kobeq séberigehe ire. (Sekaraia 13.7)

Mi ehwéhnká irarinserah ite ómiga íné nuweq kobeq séberigehe.

28 Manikánka íné oganúq intáhnaraq Kehrari marákórápéq ebeq konaq inehe sigéhe úwe.

29 Úwana Pítaga Sísansabé, Ómiga are áúwéhraqmé ínéga íre auwanauge úwana

30 Sísaga wensabé, Teawiníboq írátíahno. Ibora inókáhpéq kokórega téhtarérákq ehwehnina inaraq arega íné íre tagaríoge apahtárórákq irariniewóne úwe.

31 Úwana Pítaga mi ehwéhnsábé anotahtaq ahqáho éna Sísansabé, Mó kegá arereq ínéreq iubiq súéhraqmé ínéga are aiq tagaríoge atanauge úwara sega moke wega irarúnserahnuwe.

Sísaga Késémáni matábúráq kobúrerú ehwehne.  
(Mátíyu 26.36-46, Árúka 22.39-46)

32 Sísareq we kéro kereqka mitaq suera mátabu áwíq Késémáni pokuwe. Sísaga sensabé, Ite mahtaq tútuue míehrana íné kobúrono éna

33 Pítareh Sémisireh Sónireh móbeq mórítowe. Mórítena wene arupipeq anotah uméhue págege agúwana

34 wega sensabé, Nirupipeq anotah uméhinka pukorahuge. Mahtaq tótuqméq tagaríáhiro éna

35 se suena wahtotaq móbeq pokéna marakóraq káuqmunue ména púrerúwe. Púreréna íre kaweq sunúq weba sínehoéna púrerúwe.

36 Púrerue mahraréna, Nániboo, arega moke miraorahóne. Mah íre káwéq sunúq móruo. Íre íné nuwahbeh sansá peh are awahbáhna sansánúno ue púrerúwe.

37 Púreraruena wega Pítarehba kouwekéna tagówara sugówe. Sugówana wega Pítansabé, Sáimónio, aneqsabé sugahno? Pehgáriq tanahráq árahinsabé íre tótuqmé níwénunorahoo?

38 Iteiyuwanka kaweq sansánéyabe iuwahbehre. Peh itene inonka mareqmarero puaq íre miraorahowe. Minayabe owainawanka ahababáq aitehnehboq tótuqméq púreroro éna

39 mónkakáq kobúrerúwe. Métáq púrerúnserahnue mó púreréna

40 Pítarehba mó kouwekéna tagówara se anotah mukúqmáhkúru puara se peh sugówe. Sugówana Sísaga iriritowara siyehitónsabe ehiya míówe.

41 Sísaga apahtárórác kéna séna ú púana sensabé, Ite peh ahrenaneheéq sugaho? Aiq míre. Íné wehukení úku aní ahababáq ke kowerire tanahráq aiq sire.

42 Pokonehboq irigoro. Tagahro. Néne naruo koweriréh ánínká aiq sire úwe.

Súrásaga Sísane naruo koweriro ehwéhne.

(Mátíyu 26.47-56, Árúka 22.47-53, Sóni 18.3-12)

43 Sísaga mi ehwéh irarútaq Súrása we kéro anínká apubúue súwe. Manikáne ehweh mibeq mahbeq arítáh kéreq Mósísiga miraoro ú ehweh síwáhnoro kereq Asiu kené aboawah wehreqka áhnte mó ke eqmaq súowara sega pokamarinkákáq sahmárinkákáq Súrásareq morárác suwe.

44 Seneherautaq koweriro anínká su ke teriena, Ínéga nánkóqnahna anímé Sísá wire. Táhtoqme kawerue meqme móáúwáhiro úwe.

45 Minayabe Súrásaga sútaq Sísaba apubúue séna wensabé, Íwáhnoraníno éna nánkóqnówe.

46 Nánkóqnówara sega Sísá táhtoqme ambubue táhtotíówe.

47 Táhtotíówana mó anínká wene poka mewena Manikáne ehweh mibeq mahbeq arítáh áníné arambehri aní apiwe wene ahre kiraq auwowe.

48 Kiraq auwowana Sísaga sensabé, Aneqsabé aebó aní táhtoráhnserah pokankákáq sahnkákáq íné meniraneheéq seo?

49 Mó wehekáh mó wehekáhnue Manikánsabe iwíáh íwíáh atáh náhtápéq áhnte wehekáh itereq ména íwáhnorurautaq mi tanáhráq itega íné íre táhtotiarowe. Manikáne ehwehnka irarinserah aiq pútaraginkeheéq miraowe úwara

50 we kéro kega Sísá auwera pehbeheráh pokuwe.

51 Pokuwana káriq mahbígá peh taberábe ambántá úbíqumena Sísá anehe kaqmena kérowe. Kérowara míó kega we táhtorówana

52 wene ambanta kesuena pehrákora pehbeheráh pokuwe.

Wahnah kegá aboawah weh míórabeq Sísá ehweh ató ehwehne.

(Mátíyu 26.57-68, Árúka 22.54-55, 63-71, Sóni 18.13-14, 19-24)

53 Segá Sísá meqmera Manikáne ehweh mibeq mahbeq arítáh kéné wahnahpa pokuwara moke Manikáne ehweh mibeq mahbeq arítáh kéreq Mósísine ehweh síwáhnoro kereq Asiu kené aboawah wehreqka mitaq momiwíuwe.

54 Se mótaq we mótarue Pítaga sinehe kaqme kure Manikáne ehweh mibeq mahbeq arítáh kéné wahnahne nahnoerápéqté matabúráq kúwe. Kure mitaqté párisiréhreq tútuue méra iraraq totoruwe.

55 Manikáne ehweh mibeq mahbeq arítáh kéreq moke mó kaunsírí kéreqka Sísá subiq suanéhboq wega ahababáruime insega tagarairo éra kabaruwara íre pahsúówe.

56 Sísaga miraúnsabe áhnte kegá péhe éhwéhnera íre morá éhwéh iraruwe.

57 Táhmaro kegá irigue péhe éhwéh atera mahraréra,

58 Itega wene ehweh írátáúne. Wega iraréna, Manikánsabe iwíáh iwíáh atáh náh wehukega pearó nah sokoruqme apahtáro wéhékáh mó nah pearaníe. Íre niyahnkarataté pearaníe uraire éra

59 sene ehwehme peh úbíráhbíq ehwehnéra íre morá éhwéh iraruwe.

60 Manikáne ehweh mibeq mahbeq arítáh kéné wahnahnka irigue ákáhpi kowéna Sísansabé kasenéna, Mah kegá arensabé irare ehwéhme arega íre terieráhono? Sene ehweh aiq pútaq ehwéhpo úwana

61 Sísaga íre iraria peh ehiya míowe.

Peh ehiya míowana wega Sísansabé, Manikánka ite Asiu ke meirena kaweraitankeheéna peh morá ání omaq atowe. Arewe mi anípo? Arewe Manikáne ahninkáwábo kasenúwana

62 Sísaga wensabé, Íné we uge. Íné wehukení úku anínká Manikáne ayah púpeq tútuue ména íopeq írábúyápipeqté tuonaq tagagehe úwe.

63 Úwana Manikáne ehweh mibeq mahbeq arítáh kéné wahnahnka mi ehwéh irotaq abiahsanú púana wene korósi subansuena mahraréna, Wega aiq irarinsabé mó keyábé móme íre kasenoro. Ahqáho.

64 Wega Manikánsabe íre kaweq ehwéh atéhraq íráhwe. Minayabe aneratanéhnkono úwara sega moke mahraréra, Wega ahababáq ehweh aiq irari puaq subiq suo atanéhe uwe.

65 Táhmaro kegá Sísá tehqni atera wene auranabiah ambantaraté akariatawéra subiqmarera, Insega are subiqmarehro? Teio uwara párisirehga Sísá meqmera mósubúwe.

Pítaga, Sísá íre tagaríoge ú ehwehne.

(Mátíyu 26.69-75, Árúka 22.56-62, Sóni 18.15-18, 25-27)

66 Pítaga nahnoerápéqté mátábúrác tumíowana Manikáne ehweh mibeq mahbeq arítéh ániné arambehri ahrárigá súwe.

67 Súwana Pítaga iraraq totorúwana mi ahrárigá we tagéna ebitáwéna wensabé, Are Sísá Néhsara suwahpeqte áninseq míarone úwe.

68 Úwana Pítaga ahqáho atena, Arega iraréna ehwéhme íre ahteboqe. Aneq ehwéhnono éna mitaq suena méhpehpeq pokúwana kokórega téh ehwehnúwe.

69 Mi ahrárigá méhpehpeq Píta mó tagéna míó keyabé, Mah animé Sísá awahrahní míre úwe.

70 Úwana Pítaga mó ahqáho atowe.

Pehgáriq motác tahnsa mitaq míó kega Pítansabé, Are Kehrari marákórápéqté ání púah are wenawahrahní móne uwe.

71 Úwana Pítaga ehbonéna mahraréna, Manikánka tagaríéhtác aiq pútariahnsanuge. Itega irare animé íné íre tagaríoge. Ínéga péhe éhwéh teawénaraqmé Manikánka íné nubiq suankéhe úwana

72 kokórega mó ehwehnúwe. Mó ehwehnútaq Sísaga teawu ehwéh Píta ahrreraq kowe.

Mina teawu ehwéhme, Kokórega téhtarérác ehwehnina ínaraq arega apahtárorác íné íre tagaríoge irariniewóne úwe. Pítaga mi ehwéh ahrreraq kowana wene arupipeq umehúwana anotahtaq ibisówe.

15

Sísá meqmera Páhírátiba móátó ehwehne.

(Mátíyu 27.1-2, 11-14, Árúka 23.1-5, Sóni 18.28-38)

1 Ahbiahipeq Manikáne ehweh mibeq mahbeq arítáh kéreq Asiu kené aboawah wehreq Mósísine ehweh síwáhnoro kereq moke mó kaunsírí kéreqka momiwíue Sísá subiq súéhra ehwéh sío síoéra wene ayahnkaratác nágáqtate táhru táhrue meqmera anotah wahnáh ání Páhírátiba móátówe.

2 Móátówana Páhírátiga wensabé, Arewe Asiu kené wahnahpo kasenúwana wega wensabé, Arega aiq iraréne úwe.

3 Úwara Manikáne ehweh mibeq mahbeq arítáh kégá Sísá áhnte ehwéh atówe.

4 Ehweh atówana Páhírátiga Sísansabé, Segá arensabé áhnte ehwéh atáhwe. Minayabe arega ehweh íre terieráhono kasenúwana wega peh ehiya míowe.

5 Peh ehiya mío púana Páhírátiga iwíáhue tagéna áhtenúwe.

Páhírátiga, Sísá awankátaq táhparáhro ú ehwehne.

(Mátíyu 27.15-26, Árúka 23.13-25, Sóni 18.38--19.16)

6 Anotah tahutáhuro tanáhráq mó opéq mó opérué karábúsiipéqté ání Asiu kegá pugeqio teawú ani Páhírátiga pugesuaq pugesarúwe.

7 Wehukení wenáwíq Párehbae. Wereq mó kereq ebehutaq Párehbaga wehukení subiq suonsabe karábúsiipéq míowe.

8 Karábúsiipéq míowara áhnte kegá kire Páhírátinsabé, Are ahriahri mira aruqarurona serahnúno uwe.

9 Uwana Páhírátiga sensabé, Asiu kené anotah Wahnáh pugeq inínkono kasenúwe.

10 Kasenéna iwíáhéna, Manikáne ehweh mibeq mahbeq arítáh kégá, Sísaga ite kiotaikíneho éra abiahnsa atáh púara ínéba meqme sewe íwíáhúwe. Mira íwíáhú púana wega sensabé, Asiu kené anotah Wahnáh pugeq inínkono kasenúwe.

11 Kasenúwara Manikáne ehweh mibeq mahbeq arítáh kégá míó keyabé pagu pagunéra, Mah ehwéh Páhírátiga koreawéro. Wensabé teaweq, Párehba pugeqauwe Sísaga subiq súáhro arito koreawéro éra pagu pagunuwara míó kega, Párehba pugeqio uwe.

12 Uwana Páhírátiga sensabé mó kasenéna, Itega ite Asiu kené Wahnahne ue áwíratáh ánímé aneratanínkono úwe.

13 Aneratanínkono úwara sega ehweh kikiréra, Awankátaq táhpawe subiq suo uwana

14 Páhírátiga sensabé, Aneqsabébo? We aneq ahabábáiro kasenúwara sega mó anotah ehwéhnaéera, Awankátaq táhpawe subiq suo uwe.

15 Uwana Páhírátiga míó kene sirupipeq eyoyóigeheéna Párehba pugeq auwena Sísaga áréti sahtáté subóro aritena sóntía kegá awankátaq táhpawe subiq suageheéna siuwe.

Sóntía kegá Sísansabé awiréh ató ehwehne.

(Mátíyu 27.27-31, Sóni 19.2-3)

16 Sóntía kegá Sísaga meqmera wahnah anínká ehwehúrabeq kibekue móatera ómi mó sontía ké síáhrabuwara momiwíuríowe.

17 Momiwíera peh morá tautáúq korósi abaq atera ógaratáté keborarera wene ayahqnotaq suki atówe.

18 Suki atera wensabé, Aiq míahno? Arewe Asiu kené Wahnah mone éra

19 wiahno sahtáté ayahqnotaq subiqmarera tehqni atera sirehunseraráq méra Sísansabé péhepehe iwíáh iwíáh atera

20 awiréh atówe. Awiréh atera abaq ató korósi akai auwera wewene korósi suki atera awankátaq táhparanehéera meqmera pokuwe.

Sísaga awankátaq níriraté táhparó ehwehne.

(Mátíyu 27.32-44, Áruká 23.26-43, Sóni 19.17-27)

21 Sóntía kegá Sísaga meqmera pokuwana Sáiríni marákórápéqté ání wenáwíq Sáimóni ahtapeq sure Sarúsarama suwahpeq pokinieéna sótaikinaúwe. We Árékásántareq Árupareqne sibowá míowe. Sóntía kegá we saiqnatera, Sísaga táhparéhra awánkámé abaqme kúno atónsabe abaqmena kúwe.

22 Sísaga meqmera Kógóta sawéhrápéq kíúwe. Mi sawéh áwíqmé áwahewé wehukení ayahqno tánúnsutapére.

23 Mitaq sega íre érorahi kitabeh maráhsíní mewera náhniáq sera anopipéq sombirahue Sísaga náuwana ahqáho éna íre nowe.

24 Íre nowara sega we meqmera awankátaq níriraté wene ayahnkaratáq subiqmaq aigáratáq subiqmarue táhparera awanká pankeqme marakóipeq pearówe. Pearera, Wene korósi insega meyanabomo éra saraqmianeheéera káhsíue saraqme meyówe.

25 Wéhékáh ío ákáhtaq kiutaq awankátaq táhparówe.

26 Ehweh ató ehweh kanehraq sehiranúwara wene ayahqno abobórahpeq awankátaq táhparówe. Mi sehíránká mahraréna,

Asiu kené Wahnahne úwe.

27-28 Sísaga awankátaq táhparórabeq aebó áníte moq awankátaréráq níri pewe táhparéra pankeqme ayehré ayehré pearówe.

29 Pearówara mitaq sótaiku kegá Sísaga tagéra awiréh atera sinuo kóbiq kóbíréra wensabé íre kaweq ehwéh atówe. Íre kaweq ehwéh atera mahraréra, Manikánsabe iwíáh iwíáh atáh nah sokoruqme apahtároráq mó pearahráhóna aníno,

30 arere séhréhuño. Oga míankehboq marakóipeq tueagúno éra awiréh atówe.

31 Awiréh atówara Manikáne ehweh mibeq mahbeq arítáh kéreq Mósisine ehweh síwáhnoro kereqka moq awiréh atera mahraréra, Wega mó ke kaweraritena peh wewe íre kawerarahire éra

32 wega, Íné áhnte wehuké merirena kaweraritankeheéna Manikánka omaq intowe íwíáhire. Íné Ísara kené Wahnah aní múge íwíáhire. Wega maraipéq tueagínaq tagéq wensabé aiq pútare atanéhe éra awiréh atówe. Awankátaq táhparó anitégá moq íre kaweq ehwehnéra Sísansabé awiréh atóye.

Sísa pukú ehwehne.

(Mátíyu 27.45-56, Árúka 23.44-49, Sóni 19.28-30)

33 Wéhékáhnabubu moke mah marákó marákó sunkíkíragúwana ío tunsorerutaqkakáq peh sunkíkíratíowe.

34 Tunsorerutaq Sísaga wewene ehwehtaq Wenabonsabé anotahtaq mahraréna, Írói, Írói, tahmah sabáhtahnie úwe. Mi ehwehnúmé, Nániboo, Nániboo, aneqsabé íné nuwahno úwe.

35 Úwara táhmaro iriwe mío kega irera mahraréra, Íráhro. Éráisansabé áhrabire uwe.

36 Mibeqté ánínká pehbeheráh sehenáh tahnsa náneq mewena kítabeh nah naneqpipéq pámbáhue sehikaratáq maqme pankeqme Sísaga píbira nankeheéna awuwe. Awena mahraréna, Éráisaga marakóipeq atanabiramo. Taganeheqmúne úwe.

37 Úwana Sísaga anotahtaq ehwehnéna putiowe.

38 Putiotaq Manikánsabe iwíáh iwíáh atáh náhtápéqté párahnkéq tahnsa ónsá senahpeqté subame tunse téhtaré úkúwe.

39 Sóntía kené kíápéténiga Sísane auranabiahtapeq ména we putionsabe tagarawéna mahraréna, Mah anímé aiq pútaq Manikáne ahninkáwá wíre úwe.

40 Sísa putiotaq ahreronká mobeq iriwe méra awahnkanuwe. Mágára suwahpeqte íní wenáwíq Máhriáe. Sémisi anehe piah anínseq wenawah Sósépareqne sinowa wenáwíq moq Máhriáe. Mó íní wenáwíq Sárómie.

41 Sísaga Kehrari marakórápéq síwáhnorútaq mi inítógá we kéréra wene táhutahuq tíátówe. Mi inítároréq mó Sarúsarama suwahpeqte su ahrérónseqka mobeq iriwe méra awahnkanuwe.

Sísane anonka maisé onápípeq maisaró ehwehne.

(Mátíyu 27.57-61, Árúka 23.50-55, Sóni 19.38-42)

42 Ahbiah tahnsá ahrena ahrena wehekáh ibora táhnsá táhutahuq kaweq kaweré wehekáh ío tupekútaq Sósépage Páhíratiba pokúwe.

43 Sósépawe Árimátéa suwahpeqte anínúwara mó kegá, We kaweq abóawáh wéh wíre íwíáhuwe. We Manikánka wahnah wahnahni tanáhráq áwénunue taga tagaú aní míre. We íre áhrea Páhíratiba pokéna wensabé, Sísane anonka mewena mómaisaranínkono úwe.

44 Úwana Páhíratiga, We putiehramo íwíáhéna kíápéténine wahnah áhrabéna, Aiq putiehro éna kasenúwe.

45 Kasenúwana, Aiq putíéhre úwana Páhíratiga Sósépansabé, Wene anonka meyo úwe.

46 Úwara Sóséparehga íre wahto taberábe ambántá paiqmarera Sísane anonka kiwewe marakóraq márumarera ambantápeq úbíqme mewera ubusa onápípeq mómaisarówe. Maisarera ebah ubusa onápípeq marera anotah ebáh paentáwe kure maisiaró mehphéq paiqmarera pokuwe.

47 Mágára suwahpeqte ínínseq mó wenaogo Máhriá Sósépane anowareqka Sísa maisaróabeq tagoye.

16

Sísa oganúkú ehwehne.

(Mátíyu 28.1-8, Árúka 24.1-12, Sóni 20.1-10)

1 Ahrena ahrena wehekáh parabagúwara Mágára suwahpeqte íní Máhriáreq Sárómireq Sémisine anowa mó Mahríareqka Sísane anonka abaq ataneheéra kaweq kunkúni werí paiqmárowe.

2 Paiqmárowana o wikí kowara ebeqte wéhékáh ahbiahipeq ío kiembogútaq mi inínsónká

maisiaró onápípeq pokéra ahtapeq kure

3 seye náhenéra, Méhpeh paiqmárah ébáhmé insega paentáwe méreitanabomo uwe.

4 Uwana anotah ebáhnaba kowara sega tagowana méhpehta q íre paisa peh móbeq kowara tagowe.

5 Tagéra maisiaró onápípeq kibekuwana íre wahto taberábe korósíákáq máhbí éberiopeq tútuue míowara tagéra áhtenuwe.

6 Áhtenuwana wega sensabé, Íre áhtenoro. Ite Sísá Néhsara suwahpeqte ání awankátaq táhpato aní seragahwe. We oganúkéna mahta q íre míéhre. We maisatotaq tagahro.

7 We kéro kereq Pítareq korerieq, Wega Kehrari marákórápéq ebeq kínaq itega mitaq kirataq tagagehe. Wega teiátáinserah itega mitaq we tagagehe koreriéro úwe.

8 Úwana mi inínsónká tueyokéra iransánue áhtenunsabe pehbeheráh kure áhreu puara ahtapeq sótaiku ke íre teriasa peh ehiya méra pehbeheráh kótaikuwe.

Mágára suwahpeqte íní Máhríaga Sísá tagó ehwehne.

(Mátíyu 28.9-10, Sóni 20.11-18)

9 [Ebeqte wehekáh o wikí ahbiahipeq Sísá oganúkéna wega Mágára suwahpeqte íní Máhríaba ebeq súwe. Wega mó tanáhráq abapete téhtaré ówáinawánsabé, Máhría auweq pokoro arito íní míre.

10 Sísaga mi iníabá ebeq súwana mi inínká pokue Sísá kéro keba pokúwara Sísá pukúnsabe wensabé sirutaboiráa ibisowana Máhríaga koreriena, 11Sísá oga míéhra tagoge úwe. Úwara wene ehwehnsabé íre aiq pútare atówe.

Sísá kéroya ánitégá ahtapeq Sísá tagoya ehwéhne.

(Árúka 24.13-35)

12 Anehe téhranitégá uworapeqté áhtápéq nogúyataq Sísaga mó aní tahnsa úkue seba súwe.

13 Súwara sega kouwekéra moke Sísá kéro ke koreríuyara sene ehwehnsabé moq íre aiq pútare arítówe.

Sísaga we kéro keyabé, Néne ehweh koreriéro ú ehwehne.

(Mátíyu 28.16-20, Árúka 24.36-49, Sóni 20.19-23)

14 Anehe we kéro ke peh abapete morá ké méra táhutahurutaq Sísaga seba súwe.

Sirupipeq págege éra we oganúkú ehwehnsabé íre aiq pútare arítónsabe sensabé siwehguúwe.

15 Sensabé, Moke mah marákó marákó pokue mah kehiná kéhiná kaweq ehwéh koreriéro.

16 Inénsabe aiq pútare aintera wání meyéhra kewé Manikánka oganúq sitankéhe.

Inénsabe íre aiq pútare aintéhra kewé ehweh aritankéhe.

17 Inénsabe aiq pútare aintéhra kegá teiéna otáq sánsá miraigehe. Neníwírue

owainawamarí kaqsuagéhe. Kambare ehwéhniagehe.

18 Ayahtate wehe táhtoragéhe. Pukorahi naneq nehrataq íre pukigehe. Siyahnkarataté

awahre ke táhtoréhrataq kaweraginkehe úwe.

Manikánka Sísá íopeq tumero ehwehne.

(Árúka 24.50-53, Eqmaro Ke 1.9-11)

19 Sísá itene Wahnahnka aiq teriuwana Manikánka we íopeq tumerowana wene ayah púpeq tútuue míowe.

20 We kéro kega pokue mah marákó marákó áhnte kehiná kaweq ehwéh teri terinuwe.

Itene Wahnahnka se séhréh aritonsabe sega ótaq sansá mirauwara író kega tagéra, Mah ehwéhme aiq pútaq Manikáne ehwéhne uwe.]